

嘉慶湖北通志未成稿

章氏遺書卷第三十

湖北通志未成稿

蕭山王宗炎編次

吳興劉承幹校訂

名宦

明劉餘慶字廷吉江夏人景泰癸酉鄉試第一天順初選知縣同選二十八人是夜帝夢二十八宿見因盡授御史餘慶得浙江道歷貴川副使時都勻作亂捐俸撫綏事平致仕刑部嘗稱其斷無主之冤存有孕之婦爲稱職云

明佟卜年字觀瀾父養直遼東人寄籍江夏爲開原參將曾陷重圍突出後贈鎮國將軍都指揮同知卜年萬

麻丙辰進士授南皮知縣尋遷夔州同知素善經略熊  
廷弼廷弼疏薦卜年有經濟才陞山東監軍僉事卜年  
力辭不允單車之任後廷弼被論媚璫者並構陷卜年  
致償遼事都御史鄒元標當質問時仰天歎曰此莫須  
有事也刑曹顧大章亦力爭竟死於獄年三十有八獄  
中題壁云生逢堯舜慕夷齊首陽無媿天日鑒之又自  
著有幽憤先生傳父子俱崇祀鄉賢子國器 國朝初  
歷官福建浙江江西巡撫所至有聲後家江寧

明劉民悅字時可江夏人萬厯己未進士授富順知縣  
歲斷不肯承上官指中忌而歸尋補蘇州教授飭廟學  
攷祭器作郡學志歷南戶部主事筦江北倉筦倉宿有

羨利民悅盡籍歸公時鄭三俊爲尙書指所坐期之遷汝寧知府府有豪持官短長號爲八部通家民悅廉其名不少貸出是不得志甫期而歸築漢陰園逍遙林壑以壽終所著有杖景園集憤語作喻錄富順汝寧日歷蘇郡學志及勸民曉俗諸書焦尾集秉燭編瑣尾集徐永佑字天自漢陽人夙有文名康熙壬辰進士除丹陽知縣調吳江吳江賦稅甲江南永佑催科不擾民感戴之擢本府知府至貴州兵備道勞勩卒官

楊志道字聖階監利人以諸生例授石城知縣初抵官姦吏欺誑百出志道不數語輒洞其隱吏駭不敢爲姦有拾偶人於塗者架屋供奉詫以爲神禱應如響遠近

風靡志道投木偶而火其屋民始駭卒乃信之贛州故  
食廣東官鹽道遠價昂石城又逆流七百里輓運維艱  
民間常至淡食志道知閩汀捷徑可通牒請官運鹽價  
減約大半招商設埠自此贛州十餘城俱有贏鹽調豐  
城地濬大江又當章贛吉袁諸水之衝隄埝築旋圯  
志道深水知下多泉穴椿木不固請帑數萬金用石炭  
塞穴而覆甕其上加土石築之屹不可動至今賴焉調  
鄱陽值歲大饑米貴三倍志道大修縣城工以代賑又  
爲酒食召富宰勸出粟富室恐減價志道命增其價富  
室皆喜爭出糶旬日得萬餘石米價頓平升南康府同  
知曹聞多暇上官多移他縣疑獄就平南豐縣民有祭

賽神會知縣不察以聚眾謀叛聞志道力言其枉至以去就爭之竟從寬典全活甚多歷處州金華知府皆有政績所至尤能課士興文士林多興起焉

袁世振傳

補第十傳

袁世振字抑之一字滄孺蘄州人萬厯二十六年進士授臨川知縣水次建倉免漕兌候守善論文知艾南英於童子升金華府同知戶部郎中鹽法壞商鈔不售諸大賈哭於部堂世振條上十議僉言不能行私相誚笑帝覽奏知其能特授按察副使疏理兩淮鹽法賜璽書疏理之官自此始先是困戶專利弱買贏賣引滯不行國課匱乃行套搭法種引於五年前行引於五年後舊

引積壓新引不行鈔無所售商困課益不入世振立十  
綱法以一綱行舊引九綱行新引向以新引四十八萬  
聚責於二十萬舊引之商今散行於三百餘萬超掣中  
以通其困期十年復故令甫立羣商歡趨數日輸銀十  
四萬兩未兩月而十倍完解額三十四萬還套搭三十  
四萬補司庫六萬邊商新價四十萬不事鞭朴而引無  
積滯因募兵與寵勇犄角連營部勒以兵法每營三十  
人為率距二三里編次甲乙捕私販者乙營獲功則罪  
甲營癸營獲功則九營皆坐期年法大行舊額外溢七  
十萬朝廷降敕嘉獎泰昌元年疏報成功繳前所賜璽  
書云臣初立法解其套搭速其超掣而內商疏矣九邊

勘鈔到淮卽令親相貿易不落國戶之手每引得價五錢五分歸辦糧草而邊商疏矣減斤增引隨時伸縮不使淹積不售而水商疏矣自丁巳訖庚申竣役凡疏理四年徵解餘沒等銀入太倉二百八十六萬三千六百四十二兩邊倉一百五十六萬三千六百二十四兩銷賣新鈔一百八十四萬二千九百四十引有奇行積引一百三十萬有奇此疏理以後歲額之數也括助遼餉銀二十三萬兩有奇司庫內餘積漲綱一十一萬兩有奇折價補庫一十萬兩有奇兩淮課額舊止六十萬近年雖增六萬然每年借庫十萬外與未增同自臣疏理併入額內而商亦不覺其增若十年後舊引盡銷江南

增銀五萬餘兩太倉之停壓可補也淮揚食鹽初年行七萬三千餘引徵過沒餘四萬六千餘兩近雖大減每年亦六萬兩入庫預給邊商之引價可使循環不絕凡此皆疏理以後額外之數也有嫉者謀去世振用其黨世振因力求去熹宗立奄黨誣世振贓詔下揚州府推勘坐募兵建準提庵糜費銀二萬兩銀鎔徵比諸商擁泣不終日代完世振既放歸疏理之官亦裁鹽法又大壞矣後朝廷思其功崇正五年起爲揚州海防副使兼理鹽法未到官卒著有鹽法綱冊十六卷

陳光龍傳

陳光龍字義臣黃陂人順治十六年進士任南陽推官

有獄坐大辟七人光龍廉雪其冤改廣西平樂知縣平樂爲嶺外巖邑去京師萬里不靖之徒負隅走險光龍勤撫字各化其政吳三桂逆叛帥孫延齡潛謀不軌光龍密上書巡撫馬雄鎮雄鎮易之而孫逆漸露光龍又上書雄鎮疑懼不敢先發孫遂舉兵叛陷府縣逼平樂光龍堅守孤城四十餘日內無所恃外無應援孫逆復以重兵臨城光龍誓死守禦逆弁聶祿開門迎降光龍棄家冒矢石抱印奔梧州乞師妾鄧氏幼子粵郎及家屬十四人皆陷於賊其友袁密山於鋒鏑危難中保其家人寄養猺崗密山幾爲孫賊所殺不悔也光龍有貞可齋集唐宋詩其自序曰鞠躬盡瘁死而後已人臣之

義也邑存與存邑亡與亡守令之責也托死無門偷生罔效余之罪也余之罪也康熙十三年二月十八日粵帥孫延齡叛凡我百執事或脅以斧鑕或誘以爵賞桂林悉陷平樂與桂林地實相逼越三日僞檄下撤郡將徐援去又二日巡撫馬公憂桂林兵力弱調守弁帶兵五百人去平樂自明季喪亂以來邑無居民無紳士廬舍無商賈無土著匠作工役諸輩可供長吏臂指使者城池之任寄之郡將四門鎖鑰郡將司之郡將去將非我將兵安得爲我兵余不揣孱弱惟以身殉百計婉結存餘諸弁卒聊固吾圉以待外援之來引領四十餘日援弗至因筮得節曰節亨苦節不可貞余不禁泣下貞

若不可吾終烏乎可因矢貞以待終三月二十九日捧  
兩廣總督金公檄駐師梧境 命朝下夕可迅臻余幸  
之又檄云余前往面陳予方擬就道逆適重兵來寇守  
弁聶祿開門迎降余乘閒奔梧赴轅門作秦庭七日之  
哭機務嚴密羈旅之臣難以洞悉大率總督曰可藩王  
曰未遠可總督曰事急矣立拜表而過行藩王曰無庸  
急應候 廟算既果兵弗進噫邑且弗問曷有乎家噫  
更曷有乎身余漂泊行閒進罔裨於國退憂累乎親驚  
魂之下偶有形諸譖噬者顏曰咄咄吟竊摘唐人之閒  
吟寫孤臣之慟哭因以慨夫凝碧池邊東巡帳下爲歌  
爲泣古今來幸不幸何如也光龍後擢梧州府同知大

吏忝以軍事頗中肯綮兩年事平力請歸奉父疾光  
龍敬侍醫藥衣不解帶者數月卒年七十有九

李枝永字亞山號果園江陵人康熙庚午副榜官應山  
教諭性清介其先人有藏金子敬元見金精出沒如白  
雞狗以告枝永笑不答官應山歲飢奉檄監賑當事夜  
饋以米固辭不取時學署蕭索妻方率家人紡績易脫  
粟過午始一餐也官十七年雍正癸丑請告歸牒甫造  
而報升安陸府教授安陸善地或請追還遺牒不可曰  
是自欺也家居值江陵歲祲有司勸縉紳捐賑吏持簿  
詣枝永曰但請書之爲鄉里風聲知公清宦不須金也  
枝永曰生平無虛言卒典質與之子四人葆元知名

葆元字扶蒼號荷亭枝永生五子長升元其三涵元俱見別錄其四敬元而葆元爲季枝永生第二子甚敏慧未名而殤始鮑思之甚夜輒夢見如平生一夕夢兒辭去云將赴雲南爲鄧氏子十五年而卻還依母自是不復夢後十五年復夢兒還喜投母懷覺生葆元乳名雲童穎尚能文爲諸生與涵元升元俱有時譽江陵人謂之李氏三元乾隆丙辰舉於鄉庚辰除襄陽教諭課士有方羣情推服會軍興需馬上官檄葆元理之事集而民不擾有老生健訟上官屬葆元訊之葆元委折開諭爲書作數百言論之老生感動泣下懷牒而去監司歎曰州縣吏如李司諭豈復有滯獄耶官襄陽十二年升

常德教授以學問品望見重上官乾隆丁酉卒年七十有八

李方萃字升伯孝感人乾隆丙辰舉人初試浦江知縣天旱步禱雨隨時降會疫作其俗染疫之家親鄰不相顧卽父子夫婦皆避於外方萃宛曲開諭違者痛懲之躬齋戒祈天七日而疫漸息縣有月泉書院爲宋朱子講學處前人久廢方萃捐資重建文風旋起再試青田縣閱前官所定某甲殺人坐抵獄辭多疑請於憲司覆勘果冤遂得釋乙亥授天台知縣天台地瘠民貧姦民健訟方萃訪其謀主寘之於法訟風衰息有累年逋賦幾二千金鞭笞爲累方萃念民疾苦捐俸代償民困以

魁移劇平陽海疆多盜方萃捕治甚力民以寧謐學宮  
久圯方萃新之縣人始有舉於鄉者濱海地名蒲門向  
者穿渠灌田淤百餘年未治一方水旱頻仍方萃履勘  
工大費鉅削牘請於上官設法令民捐輸遊老成謹司  
出納鳩工疏濬三年工成瘠土變爲沃壤沿海產鹽舊  
置南監場官雍正二年裁去居民因爲私利爭攘屢致  
鉅獄方萃請復場官公私俱便城北有齋堂腴田二頃  
有餘姦僧託名講經招誘男婦非時聚集方萃逐僧毀  
堂改造崇正書院收其租入益募捐輸延師課士文教  
振興官浙江十二年所至有聲庚辰壬午年分校鄉闈  
所得多知名士治效報最擢道州知州值丙戌緬甸用

兵方萃黽勉襄事衝橐鉅萬皆斥產稱貸絲毫不以累民辛卯歸休足跡不入城市鄉鄰有困乏者時周給之鄉望爲人所稱

名宦張炳鯤

炳鯤字啟溟號南池元次子也乾隆辛酉拔貢考取教習試知縣於陝西乾隆三十年權葭州值軍需葭民積逋倉穀數千嚴檄勒追因歲歉且值年終炳鯤不忍督責乃與民約開春完納先如限報完未及徵收而新官至不受抵代百姓籲請事得寢俄而民欠邀恩免炳鯤償所報數不自悔也乾隆二十九年補涇陽釐剔積案委讞三水疑獄出累囚數十人民以不冤提督營馬

夏秋例就水草兵吏不戒或害民田炳鯤嚴禁抑之三十年潼關同知詳革茶規署寶雞知縣請革里馬蓋皆病民而肥官吏者也後官邵陽四十三年值陝西旱災炳鯤虔禱以身爲民祈命三日大雨渥其境內以病告歸臨終屬子忠坦孝坦曰我歷官儉約所得廉俸思散以廣君恩不欲多積以自封也忠坦孝坦並能捐施以成父志忠坦乾隆辛卯副榜房縣教諭

### 大京官

明張添祐字仁一號鶴山江夏人洪武癸酉鄉試第一甲戌進士一甲第三臚唱畢奏曰戴德舜天下名士齒德俱優臣年少忝居其上願以讓之未幾擢詹事晉吏

部尙書賜忠良正直四字褒之洪熙元年再起爲相吏民抃舞相慶宣德二年以諫廢后忤旨歸壽終八十有四

明徐養量字京威應城人萬厯丁未進士以御史督北學拔取眞才人服藻鑑撫甘肅時一小吏以足病注下考比謁見輕捷如飛養量曰此必拙宦也奈何以疾免之并語在事者勿恣情去留屢官兵部尙書卒賜祭葬子晤可廕錦衣衛千戶見寇難傳

明裴璉字汝器監利人弱冠有才補諸生明湘獻王辟署巴東學靖江王入賀見而奇之召與同舟濟江賦詩留別薦入太學洪武中授劍州知州擢浙江按察僉事

永樂中改江西坐事免尋起爲御史瑋善論事不避權貴成祖謂之眞御史平阜山賊遷河南按察副使復坐事免再起爲御史時階州賊方熾遣瑋按治擒斬首惡餘黨數千人在文州黑山者皆不殺惟聲動山谷西土以寧後改春坊中允又改刑部主事忤當事者意出爲州知州洪熙初召爲工部侍郎改行在刑部侍郎以言事忤旨出爲涪州知州子綸貴乃乞歸卒瑋與少保楊溥尙書劉儁知州何忠尙書張純齊名人謂之荆南五君子

科道

徐鏞字用之江夏人成化己丑進士授行人遷監察御

史巡視通州時濬大通河鏞獨疏不可既而漕舟果不  
達巡按福建多善政還朝以災異陳疏條議獻貢賦正  
課程革姦弊均祿食四事又極論名器之溢講汰冗官  
會宮變請免慶成宴謫鎮原知縣值歲飢修預備倉掘  
地得古窖錢千萬周人貧乏餘以抵累歲逋課累遷督  
漕副都御史弟鉞鈺俱知名

鉞字用寧宏治庚戌進士性孝友鏞遵病鉞禱神請代  
授瑞安知縣有德政遷戶部主事歷肇慶知府致仕歸  
鈺字用厲與鉞同登進士使交趾年僅弱冠交趾設宴  
禮烹猩首以進鈺舉箸刺其目交人悚服改南貴州道  
御史告歸嘉靖初起漢中知府歷四川布政

溫如玉字孟醅號少谷鄖縣人嘉靖癸丑進士初授行人奉使荆襄卻守土饋遺擢御史巡淮揚鹽疏通壅滯商民稱便巡按陝西講求邊務陳便宜二十通皆有裨補劾罷邊帥及貪酷府縣長吏軍民肅然再按南直抗疏清丈田畝田無伏賦賦無冤戶督治河官疏濬水道自蘇松至登萊諸島亡命出沒時爲剽略乃揚軍聲脅使歸化給田起稅通關果許互市因而部勒諸島使比內地如玉屢秉憲節律身清苦居鄉不通官府居官不通家問病三月且卒於官而家人不知隆慶己巳卒年四十三如玉爲王忬所薦士忬被難門生故吏畏嚴氏不敢赴弔如玉獨遣使致賻加隆人以是多之

丁時魁字斗生江夏人崇正庚辰進士丁艱服闋除戶部郎督餉江西歲祲時魁措措經營籌畫輓運明亡狼狽走袁山出沅陵入雲南監國以論事過激予杖削籍定南王孔有德羅致之時魁固辭求歸省墓弗許留軍中縱飲數月以死

小京官

任家相字白甫江夏人萬厯戊子舉人教諭刻朱子孝經刊誤建文起堂輯論世編景行編以訓士薦陞翰林待詔充福王講官上勸學箴又條陳時務尊孝經以定試題制宗學以廣人才祠國學以崇名宦鄉賢移工部司務著雲龍閣集行世祀鄉賢

汪錞字鍾如江夏人康熙庚戌成進士歷官部郎俱稱職乙卯分校順天甲子典試陝西號稱得人既貴尤篤友愛兩世未嘗析居嗜理學不欺清夜生子四叔澧任敘州知府季澧康熙甲戌翰林累至江西廣西巡撫

葉啟豐字履廷父宏韜江夏縣選拔官內閣典籍啟豐隨父京邸由大興籍中乾隆甲子順天鄉舉戊辰進士授刑部主事歷御史署給事能言大體

曾元邁字循逸號嚴齋天門人母鄭孕十四月夢月入懷而生元邁少而秀嶷成童斐然年五十餘始舉於鄉康熙戊戌成進士由翰林改監察御史有大僚以功當論賞進止失儀元邁疏劾上嘉其直爲減賚予又請

定外官任滿之例大約謂大計之年卓異行取者數人  
貪污黜罰者數人其餘不陞不黜之員率皆假借考語  
一概留任以至道府州縣有任十數年不陞不黜者同  
知通判丞簿教官以及雜職有任至廿餘年不陞不黜  
者請下吏部嗣後官員定以三年爲滿一任凡非卓異  
與非貪污者果有士民安其政教公懇留任或監司知  
其材能力保留任或自陳有所興革未及成功願乞留  
任必督撫題明方准供職如無前留任之故卽不混許  
久仕亦不勒令休致聽其候新官交代後以原品解歸  
若歸里之後材德增修聲望昭著許在內公卿科道在  
外督撫藩臬各以所知薦舉復得起用如此則仕宦無

永綢之途而既用之官勉圖後效選補無久占之缺而將用之得及時效力矣至留任者六年再考若仍無卓異可陞無貪污可黜益當解任歸里其起用與否聽諸公論可矣若再有懇留保留陳留如前三者之故必督撫察其情事真實方准聽其三考至於三考九載則但有黜陟之分而無解任之例蓋九載而有功者必循良有德專以教化治人至於久而果有明效此當從優陞推者也九載而無功者卽是貪戀祿位庸懦無爲有功不與有弊不除再難寬貸更有別過從重治罪卽無一罪過亦必革去職銜永不敘用斷難復邀解任之例希圖起復矣書曰三載考績黜陟幽明此唐虞中正之法

歷代用之而未盡者也鄉先達某爲故大學士朱軾素  
交欲薦元適於門下辭曰朱公天下模楷然不願無故  
苟合辱知己薦其耿介如此雍正甲寅卒年六十有六  
道府等官列傳補

張至學字汝璧沔陽州人以監生例除武定知府抵任  
時陰雨連旬祈晴立應首除州縣陋規常俸外絲毫不  
取捐貲修輯敬業書院豐諸生廩餼文教振興所屬被  
災至學力請上官得賑金數十萬兩身親監視吏不得  
侵民沾實惠乾隆癸未蝗入府境至學捐貲募民捕蝗  
計斛論錢民勇赴之禾苗竟得無損開理河道疏通惠  
民濱州霑化境內之古徒駭河樂陵沔豐境內之古馬

頰河老黃河商河惠民濱州小支河皆使直達徒駭附  
近小支河又於蒲窪開溝使下瀉成種程家道口建設  
涵洞以免倒灌白龍灣一臺先築以防衝激徒駭河要  
道捐修賈橋以濟徒涉土人相傳城外有河太守賢則  
魚集至學洫任三月魚鮪充溢民呼爲張公魚以祖母  
年九十餘陳情終養時江夏崔應階巡撫山東甚重之  
強留再三不可

李堂字也升號肯庵沔陽州人乾隆壬戌進士歷雲南  
祿豐定遠太和浪穹諸縣知縣課農興學潔己愛民三  
充鄉試同考官頗號得人內閣學士錢士雲大理卿周  
於禮皆出其門運銅稱任使又條利病於前巡撫愛必

達極中肯綮擢黑鹽井提舉遷沂州知府尋調湖州值  
皇上南巡大吏奏其治績 召見行在獎勵有加湖  
州水鄉堂開濬七十二澗疏通水利值歲屢祲十年五  
賑於公帑外自捐廉俸以濟其乏又捐俸勸眾建愛山  
書院親與諸生講論不倦刻課士錄士風振起如馮三  
峻孫凌雲孫梅姚文元沈麟昫余開甲林之楨汪粵楊  
興邦崔修和沈春煦沈世楠陸大成沈樹滋王鑿孫岳  
灝孫辰東諸人皆以科第顯名重修府志頗稱核實凡  
有興舉皆率屬捐俸不以累民以親老歸養服除足疾  
不復出閉門謝客足不及城市客有過者極盡款曲日  
與兄弟諸子講論經史旁及書畫所著有紀 恩錄周

易聚樂府集要等書藏於家

邱恩榮字駕六黃岡人乾隆辛未進士授萊蕪知縣聽斷明敏屢剖疑獄有生員外出其妻誤買盜衣仇家誣證生爲盜主恩榮廉察其故立釋之鄰封蝗起恩榮約束鄉民預爲捕具入境卽依法撲之蝗害遂絕上官才之檄監曹縣賑事清釐災戶無遺無濫吏姦不得展施移繁泰安泰安劇要前官往往略於民事訟辭填積久不得理恩榮悉心剖決案無留牘疏治泰山泉源引汶水歸運河民甚利之擢吏部主事歷文選員外郎乾隆辛卯授岳州知府有姦人譁言臨湘有礦可開大吏富其言檄恩榮相度意在必行恩榮親勘知其無實墳塋

四聚毀傷必多因力持不可論者躋焉調衡州府統轄  
七城事繁政殷恩榮鎮靜不撓民受其福整飭石鼓書  
院與諸生講論無不踴躍文教振興甲午卒於官年五  
十九

程廷棟字承梁號松溪漢川人乾隆二年進士翰林庶  
吉士授刑部主事每遇秋審必精心較勘推求至當遷  
御史轉戶科給事中上所上封事多得大體見於議行好  
學至晚年不倦嘗謂古人仕不廢學歲月荏苒何得空  
過也年未六十有歸休之志寄書其子曰游子思故鄉  
余年近衰常恐隕越以貽官謗念先人墳墓多在縣南  
梅子洞邊此地山水頗佳吾將營別業歸依先人魂魄

且教子若孫專志讀書亦所以報國也尋卒於京邸  
州縣吏才

趙晉基字子培鄖縣人乾隆辛酉拔貢以兵馬司副指  
揮擢莒州知州旁攝日照蒙陰縣事廉平有政聲乾隆  
戊寅二麥將登會雨雹傷稼鄰封接壤無不被災而莒  
田畫界屈曲所至青蔥獨異己卯飛蝗自南而北同府  
州縣無得免者而莒又畫境獨完上官奇之屬以勘災  
捕蝗所至奏效晉基初蒞莒見城圯濠平不足以資捍  
衛鳩工濬濠苦無水泉忽於南濠掘深五尺見瓦器如  
甌徑圍尺餘孔具四旁附著不可動搖因命工疏剔泥  
塗泉水突從中湧滔滔流溢不日濠滿民驚謂神助焉

會保薦知府上官首列晉基以母老固辭歸里一十六  
年親終服除起補文昌知縣初下車颶風壞民廬舍拔  
木無數晉基朝服望海泣禱且曰民有罪孽守土之咎  
祈降禍於長吏毋殃及民風隨禱止大旱晉基虔禱不  
應自囚於獄三日而雨降歲則大熟

汪時泰字枚庵漢川人順治辛丑進士任儀徵縣事廉  
勤禮士京口王之瑚逋糧召詰之云貧不能措試以文  
大稱賞曰子不久貧也爲償其逋是秋王果尙尋成進  
士有落地稅時泰不取曰吾經費已足亦不敢以羨餘  
進也

南有臺字爾瞻蘄水人以舉人授句容教諭講學課士

俱有法程崇正甲戌成進士授諸暨知縣時當末造撫  
字保惠體卹多方擢紹興府推官斷獄明決民無冤者  
調東昌瓊州升南戶部員外郎潔已奉公尋陞郎中致  
仕卒於家傳載縣志宦蹟

郭本才字楚士廣濟人乾隆戊辰進士除安縣知縣創  
書院購義穀勾捕囑嚼賊黨兇暴斂迹再任崇明時海  
颶大作縣被潮浸物產蕩然本才履畝詳勘按戶給賑  
不假吏胥無遺無冒移劇無錫寧靜不擾吏民畏懷以  
捕蝗致疾卒於官

徐天球字卿石廣濟人乾隆乙卯進士歷四川順慶同  
知檄主西藏運糧西藏明烏斯藏地土人分爲三部曰

康曰衛曰藏均有大員駐藏防護而漢官輪運糧糈凡內地回民與土番交易拊循無術輒致流亡天球加意懷來民番各得其所期滿當報最以望誤降知縣尋卒游挺秀字豹文廣濟人雍正甲辰鄉舉授萬載知縣廉潔不名一錢上官瀆賄以挺秀無所進也詭索百鸚鵡示意挺秀佯不解籠百鸚鵡贈之上官恚甚吹索其疵罷官士民資給之始得歸

熊天楷字芥圃漢陽人乾隆壬申進士授清豐知縣歲旱露宿虔禱澍雨立降開州有割辯疑獄株繫多人知府李湖檄天楷覆審開釋甚多李欲本州具獄天楷固爭謂本州一有顧護株累必多李從之民慶更生李曰

熊君賜也黃河漫決檄辦糶料州縣各數百萬官吏因而漁利天楮獨取美銀平買數日畢集不累閭閻遇偏災捐廉率先補助申請未下按戶先給民無流亡官清豐二十年民愛戴如父母

曾海字谷亭漢川人乾隆甲子舉於鄉除博山知縣有豪右強奪民產數十年不能白海平反之有弟盜兄室兄賄海致其死海卻之曰以金殺弟何如以金活弟耶其兄愧悔

程廷拭字敬軒漢川人乾隆三年舉人登七年會試明通榜任松滋教諭擢福建連江知縣連郭南有玉華洞爲逋盜藪拭至修葺去其榛莽盜無潛蹤有鉅盜盤號

爲沿海患有司莫可誰何廷拭募壯健出不意擒之羣盜屏迹已而移劇福清海嶼隔大洋八十餘里民倚煮鹽爲業羣商籲大吏禁之廷拭徧勘其地民環與泣訴廷拭力白大吏願以一官殉之以謂窮民倚以爲命急且生變竟得如請後以望誤議鐫一官百姓如失慈父母攀舟泣送者一二日不絕廷拭善詩晚年解組林下詩酒自遣長子煜又官福建攝崇安縣欣然就養數爲武彝之游刻詩巖間卒年六十四

徐國柱字砥齋沔陽州人乾隆癸未進士除吳堡知縣邊塞喬野學宮頽廢國柱捐俸修葺年餘百廢具舉碑志煥然人心亦多興起有生員薛爾縝望誤除名其人

能文善補過國柱請於學使許其自新復補諸生是科  
領鄉薦卒成令名國柱善聽訟剖判微中人自無辭庭  
鮮留獄久之囹圄幾空旁攝米脂縣事米脂倉穀積欠  
至千餘石俱豪強挾持長短前官不能問吏亦不敢捕  
之國柱卽召諸豪至宛曲開諭諸豪感動不數日夙逋  
俱清官吳堡九年致仕歸行李蕭然惟買兩僮名曰琴  
一鶴一以歸以宋趙抃自況也國柱居家孝友兄國棟  
早卒事孀嫂如母數十年如一日撫兄子女教養婚嫁  
視己子女有女弟適沈而寡國柱迎養於家終其身

陳權字鼇峰應城人康熙丁酉舉人乾隆九年除博羅  
知縣二年罷歸以宿學能文福建大吏聘主鼇峰書院

後進多所成就其自課同於弟子所著四書義若干首刊行於世權鄉舉三十年始得一縣其治縣善於撫循閭閻無擾暇則與諸生講習文藝娓娓不倦其去也有民逋租稅權嘗捐俸代完民請償權權留以爲鎮閣鎮閣者形家者流言博羅水門關鎖建閣其上文風宜蔚起云

陳文偉江夏人中正統丁卯武科膂力過人常曉行遇虎手搏斃之會試場屋火文偉左據牆右持同試生超踴而出活若干人除安邱知縣有盜百餘掠庫金去文偉單騎挾彈馳追發彈中其左目再發中右賊皆伏地請送金還文偉以一騎尾後賊抵縣請死文偉曰若自

歸誠可原也各杖三十遣之御史竟以縱盜論免官

劉允寬字公量江夏人景泰庚午鄉舉任嚴州通判有  
惠政遷霸州知州霸爲九河故地水潦頻害允寬造梁  
濟之又積粟四萬斛銀三十兩備荒考滿州民請留巡  
撫彭韶下霸州所行事爲他屬法遷慶遠同知吏民畏  
懷致仕歸鄉里有不便於民者力言於當事故便民倉  
在青山允寬請移置平湖門外縣人便之又有長短馬  
夫允寬議爲六差等行之又請罷非法之刑縣人德焉  
李珍字貢甫江夏諸生正德癸酉鄉舉授大足教諭臺  
使交薦或勸賄銓曹得美遷珍不可授樂安知縣革坊  
里耗銀會入覲各里方長餽贖珍卻不受固請迺盡以

屬庫代貧民逋賦及罪囚贖緩調紫陽縣學宮祀典多  
闕珍著祭祀儀注給諸生演習縣乏科第珍改建學宮  
科第繼起歸田後閉戶讀書與人交寬厚稱長者

周文卿字蓋之江夏人隆慶辛未進士授韓城知縣丁  
艱補南海以清潔聞縣多虛糧爲害乃清沙場以無稅  
之場補無田之糧共七百餘石士民利之豪強擅海利  
文卿不避權勢悉清釐以利民創建龍津橋以濟行人  
至今賴之遷戶部主事遼東管餉郎中陝西兵備副使  
致仕歸所著有詩經使意

常居安字惟靜江夏人萬厯戊子鄉舉授隆昌知縣安  
奢兩蠻構釁時議兵勦用隆昌倉儲居安力持不可曰

如天旱何後廷議與居安合而隆昌果旱得儲粟濟賑  
遷延平通判署福寧知府有議量減海艘省金錢萬餘  
者居安復力持之曰海寇叵測無貪省事名後海寇杲  
大發人皆服其深計

周寅暘字秩先號別庵天門人籍邯西康熙壬戌進士  
除臨潼知縣爲治簡易和平歲荒姦民嘯聚山谷沿鄉  
剽掠寅暘訪巨魁殲之餘黨悉平飛蝗蔽天而下寅暘  
虔禱蝗卽退飛嘗於渭南鄰屬捐資乞糶民賴以生振  
興學校剔除積弊力懇上官請豁逋賦文武諸生逃荒  
遠出學使以避考除名凡數百人寅暘力請原復旋註  
吏議謫閩縣典史官闔十餘載兩攝縣篆不避權貴有

勢宦武斷鄉曲鄉人患之寅陽力請大吏竟抵以法巡撫李思義重修書院俾主講席士習丕變丁父憂解官歸僑居江夏杜門恂謹不涉時事巡撫陳詵布政使季錫咸器重之歲時一刺外不往見也

王開銓康熙壬午舉人雍正甲辰授平彝知縣調新平縣雪土苗冤獄單騎往諭反側羣苗帖然累擢禮部主事

陳正勳字書竹號晉齋江夏人乾隆丙辰舉人丁巳中禮部試己未成進士除臨縣知縣臨俗獷悍長吏初至則故觸法嘗刑重輕名曰試刑正勳則拘其人俛跪堂下觀所勸懲不示威刑其人率感悟遷善上官才之鄰

封疑獄多移鞠焉旁攝永寧州汾陽孝義諸縣悉奏治  
效移劇臨晉先是榆次亦需人而地視臨晉稱華膺或  
請爲之關說正勳作色謝之臨晉當秦晉之衝值西域  
用兵軍書旁午正勳部署條理軍事無乏而閭閻晏如  
會弟正烈舉癸酉鄉試用明通榜補汜水知縣與臨晉  
距不數舍兄弟素以孝友知名母胡賢有家法至是安  
車迎養於二治所人爭羨之母嘗有疾正勳齋戒禱天  
願減己算益母壽母疾遽瘳擢汾州府同知丁母憂起  
補重慶府理民同知分駐江北鎮剔弊摘姦川東人號  
爲青天忤上官意檄赴底藏司糧餉程途萬里需三年  
而代比代回上官以其稱任方欲薦擢而遘疾遽卒聞

者惜之正勳居官廉明有執守官汾州同知會禁酒酷  
大賈斂重貲以餽怒叱去之有大吏贖貨同官爭賄遺  
之正勳方官臨晉恥不肯與後大吏事發株連賄求者  
里網甚眾獨臨晉無有故通政使孫灝贈詩比之風波  
駭起川無完舟而一檣獨靜云

吏治

顧如華字質夫號西巖其先蘇州人洪武初徙漢川如  
華順治己丑進士除廣平知縣姦民造僞印前官捕急  
逃入山東榆林引賊犯大名順德及縣境如華旣備守  
具開門盡納難民探知賊巢榆林接於黃河窪下窟復  
用生員周布南計領馬步鄉勇決河上流灌之賊死者

無算乃出乞撫癸巳夏漳水泛濫肥鄉成安諸縣浸沒  
廣平先已培隄得無患丁酉擢御史廣平人生祀之辛  
丑巡按四川朝議裁巡方官召還康熙丙午出爲浙江  
參議未赴疾作著病中移心集明年卒如華與華亭沈  
麟有布衣之交常巡江浙鹽政下車先造其門遂與麟  
及學士吳偉業飲月虎邱歌詠爲樂吳人繪圖以記如  
華卒麟敝衣裹糧奔二千里哭盡哀不告而去

理學

賀時泰字陽亨江夏人爲諸生礪廉隅不妄交游與同  
里郭正域相劘切力貧課子教授生徒著有思聰錄人  
模樣三世事小錄及女箴二十四則學者稱爲陽亭先

生嘗遇歲祲除日幾斷炊以一伏雌易米豆具三宿飯  
後子逢聖貴時泰書堂聯曰當年雞豆未忘念此日兒  
孫莫妄思朝夕訓逢聖者惟餓死事小四字故逢聖卒  
以忠節顯自有傳時泰祀鄉賢

朱華因字淮仙明楚藩中尉英照次子六歲就外傳卽  
舉大學二字問師曰此何等學也師奇之十四通古今  
不屑就試二十好王守仁之學及周程朱陸諸書著匯  
書宋元詩選暨梅湖桃溪諸集晚更爲一書曰聖賢寶  
鑑論列聖賢發揚忠佞五十萬言崇正癸未夢游石壁  
見詩語類招隱卽棄家遁入桃谿不知所終

文苑

段燦字以融江夏貢生任衡山訓導喜游覽工吟詠家  
居金口鄉嘗引陶潛夜行塗中詩證金口卽古塗口而  
地志不載因自號陶谷著有陶谷詩文集

吳徹字文通江夏人雅善吟詠家貧落魄好奇元末爲  
陳友諒所得置諸親密呼爲先生友諒進攻豫章遣徹  
行偵爲明太祖所獲命賦詩旨度其終不爲用乃刺文  
於面遣還友諒不悅徹掉小舟逃去後友諒敗死其子  
理奔還武昌堅守不下太祖怒將屠城徹求見復命賦  
詩徹以詩諷太祖遂下令班師後屢詔物色之徹辭不  
出曰吾面目可憎

沈韻字四聲江夏人家世業儒兄弟四人韻居次早孤

補弟子員淡於進取城陷韻家屬淪沒遊江浙之間  
游覽山川久乃歸營母葬廢棄諸生隱梁湖之孤山偕  
妻鉏圃賣藥自給樵於山不習運斤傷左肘臥數日不  
起邨人皆笑之久咸敬愛呼爲沈秀才閒持黍相造請  
論古和歌畫則分羹夜借邨人之箕薄以蔽風露因自  
號蓑庵處士足不履市者二十年卒年五十有二韻工  
書畫尤喜爲詩頗多散佚王一寧收其遺稿刻之

周家鼎字峙鉉江夏人其先大治崇正己卯舉人癸未  
獻賊陷城家鼎奉父母竄伏湖濱父沒乃築室梅城題  
其門曰知止與母偕隱因自號梅城順治己丑會試臺  
司敦促不得已赴試入闈迅筆疾書以違格置副榜例

當除中書不就歸里杜門不出說里中素封困粟備荒  
傲常平義社法條其可行爲一書上當事康熙丙辰大  
饑大吏屬以勸輸助賑殫心經畫全活以億萬計晚年  
喜著書尤念鄉先賢熊廷弼吳裕中賀逢聖遺事恐溷  
各爲傳以表之居母喪不御酒肉者三載所著有家禮  
議宜及易詩貞通諸解學者稱梅城先生

陳紹唐字述堯號中庵京山人少負雋才博學善屬文  
困於諸生迄耄年卷不去手十歲失恃事繼母以孝聞  
率異母弟讀書力行軌於禮法兄弟垂老始分田廬取  
饒瘠不計多寡性嚴正遇物和平所居近市每過闐闐  
見者胥斂容起敬里有奕博及不肖行輒相戒勿令紹

唐知紹唐好爲人排難解紛不辭繁苦遠近數十里有  
爭鬪得紹唐一言卽解寄意吟詠無意爲工而語多見  
道又善書法著有陳氏家訓隨筆叢話竹櫬小草若干  
卷藁本悉燬於火乾隆戊寅遭火紹唐方疾勸其子鼎  
吉曰若不安貧而役於億計此祝融回祿之教汝也鼎  
吉亦能省識讀書服古無他嗜好紹唐於乾隆己卯卒  
年八十

黃利通字曉夫黃梅人康熙甲戌成進士授賀縣知縣  
有政聲值征八排徭人利通上平徭策大吏嘉之艱歸  
起工部營繕主事逾年告歸著述甚富有石亭懷亭等  
集爲高安朱軾長沙陳鵬年所稱許序以授刻從子之

騏家貧好學詩文有軌則晚登鄉薦授中書舍人閉門授徒有志學齋詩文

王旒安陸縣人工舉業能探源經史及古大家文多所選輯乾隆庚子舉於鄉三上禮部試不第卒年六十有四所著日格彙吟孝經三注七經溫故未卒業次子年長無子買妾入門知有夫欲遣之去妾曰年饑多債逋去恐終難保耳卽召其夫與偕歲稔始遣再聘又誑於媒入門知同姓女爲擇壻嫁之

高雲路字向五鍾祥諸生工詩善與人交構雨香亭坐嘯自得往來多知名士尤喜其掖人材有吳修人以賤工求食於鄉雲路愛其敏慧教以詩辭其人遂以文名

聲振於襄鄧之間雲路自著有兼山堂詩集

陳銓字又山號敬齋江陵人幼穎慧年十二補諸生十  
九舉康熙丁卯科鄉試官耒陽教諭振興學校課士有  
方所著有敬齋文集及面衡詩集子兆鼇字竹亭六歲  
失怙幼育於外氏其外祖故肅州總兵官麥良璽也兆  
鼇因嫻韜略善騎射弱冠以武生第一入巖序學使賞  
其文才面試以地肺賦千言立就學使歎息因爲援例  
入國子監卒以數奇不獲售資志以歿兆鼇有孝行父  
歿事母能得歡心晚年爲母請旌見列女傳兆鼇才  
長幹濟鄉邦公事如修文廟建書院繕試院立社倉不  
惜多金身任其勞里黨稱之著有蠹餘詩草竹亭詩譜

等集

段嘉梅字孟和漢陽人歲貢生少孤生而穎異五齡就  
傅七齡十三經成誦九齡爲文驚老宿十二補漢陽府  
學生員篝鐙攻苦鑽研不倦應鄉舉十有三次皆不利  
康熙庚子榜發自謂於世無望遂絕意進取勵學益勤  
工爲詩甫脫藁不脛而走海內嘗有契其所著詩卷遣  
人由江淮細載走數千里叩其人而與之印木者嘉梅  
初未識其人其人亦終不復通名也故侍郎呂耀曾官  
四川布政使延嘉梅官舍詢呂所由知則其父某嘗於  
康熙閒典湖廣試失嘉梅卷自以爲恨事也雍正四年  
詔內外臣工各舉一人呂欲以嘉梅應嘉梅固辭由

是名著於公卿間徧游幕府尤與故大學士陳宏謀最爲投契陳內召而嘉梅亦歸老於家孝感夏力恕黃陂李金臺黃岡靖道謨斷水徐本仙皆一時鄉望與嘉梅往來江漢稱文字交其爲詩自寫胸臆不專一家駢體之文援筆立就嘗於夜漏三嚴官衙剪燭促作十數緘書皆辭藻駢麗口授教手分書按切情事人豔其才卒年八十有二

顧鼎綸漢陽人工時文早有名晚不遇值歲試學使凌如煥見唱鼎綸名驚起曰先生尙爲諸生耶某童年卽讀先生試牘如見古人因洛誦其文且誦且贊疊疊不倦身送鼎綸歸號舍然後升坐其敬服如此

寇學海字巨源廣濟人少負奇削髮入盤山榷戶究詩  
詩成家然後蓄髮入世與一時知名士沔陽陳文燭京  
山李維楨及東南文士相與馳騁靳邸樊山王尤爲推  
許交游徧於天下游山西慶成王使所善客邀致不可  
再三強之乃至據上座箕踞不遜而王益嚴敬寇先生  
重於他客學海不羈家無宿舂糧王公大人贈金累鎰  
輒土塊擲之明社旣遷學海亦老死於客家中子亡弟  
亡其妻食貧一老婢給薪水晚年無依友人湯之相劉  
秉鈇輩周給之學海歸柩至不能葬廣濟知縣桐城劉  
應昌謁選時讀其詩知學海名因爲買地畢就窆墓碑  
表道搜遺文刻爲二餘齋稿後遭兵燹乾隆辛卯壬辰

閒同縣魏昌期搜刻其詩今行於世學海懷才不偶於世無忤而流俗或未諒之常游武昌楚王招飲學海越憲司座憲數目瞬之學海懼而逃去登黃鶴樓賦詩見志有云誰言黃祖難容物辭賦於今有是非蓋指憲司之不識也明人收入通志而不著其事後之修通志者不察其意而刪其篇昌期爲傳表之

張應宗字魯峰號可園江陵人父全桂有隱德應宗生而夙慧年十二試童子府縣長吏目爲神童長善騎射十六以武生第一入黌序尋改文學中乾隆丙辰鄉試副榜讀書穎敏自經史外旁及兵算樂律諸家無不究覽爲制舉文自辨明起至日入可得經書藝三十亦工

於詩古文其論詩文謂元詩勝宋宋文勝唐蓋自其所見也其論古謂張良擊秦用剛韓信伏跨用柔其後剛柔互易而定二人禍福又謂明成祖先存必殺方正學之心而故以草詔使之是知其必不能服而後殺之有名皆推見至隱性情灑落不治生館穀所入悉以購書或置酒娛賓周人緩急惟力足視好蓄古器書畫往往爲人持去不以介懷惟恥爲威惕利疚游江南得周鼎柴樽大吏欲重直購之應宗聞卽攜挈馳歸晚官大治教諭士安其教識拔文行後多知名學使欲論薦應宗以老固辭踰年請業者眾日不暇給惟朔望聚徒講肄餘令自條所疑書揭明倫堂壁因疏答教其下諸生多

攬以去日久積爲語錄五卷多所發明應宗天性孝友  
父歿弟應龍甫六齡應宗教養備至有過不忍責輒令  
跪墓廬自訟旣知悔則泣而諭之庭植紫荆一本中歧  
至杪復合時人謂孝友之徵後應龍中丙子舉人授新  
喻知縣頗著循聲比應宗引年家居念之不置以書招  
應龍歸築荆樹軒其老應宗著書甚多其韻衡三卷於  
古韻頗有發明其以沈約鍾山應教諸詩證四聲八病  
之言不出於約又謂反切並非梵音以華嚴字母乃中  
華釋經之文並非竺國本義爲說尤爲精確語錄於諸  
經史尙有依據非盡無實空談餘詳見藝文子輝斗附  
貢生輝翼與孫紳皆諸生一門自爲師友俱有文行

童承敘傳

童承敘字士疇沔陽州人生有異質八歲時過目成誦  
早失母繼母性嚴能善事之汴梁李濂與李夢陽何景  
明交善號中州才子官沔陽見承敘奇之屬以爲古文  
詞承敘益下帷讀楚詞文選及六朝文正德己卯舉於  
鄉庚辰成進士選翰林庶吉士與茶陵張治蒲圻廖道  
南號楚三才而承敘尤俊邁遷國子司業時涇陽呂柟  
爲祭酒倡明理學承敘佐之教育人才與修寶訓寶錄  
會典諸書進左春坊左庶子兼翰林侍講壬寅上疏省  
墓給馳驛歸未幾病卒世宗深悼惜之遣官諭祭承敘  
在詞垣二十餘年世宗御經筵承敘講立政諸篇倦倦

於用正人端國本聲如洪鐘徹殿廷世宗喜動顏色賜  
飛魚服常遣中官走問童先生安否其荷眷遇如此時  
夏言當國忌承敘才又學士多遺言金得美遷承敘笑  
曰何可爲此先是承敘在館大學士楊廷和楊一清雅  
重之張孚敬以議禮驟登政府新進附者如蟻承敘獨  
閉戶寂守常奉使唐藩唐王厚幣請文一物不受風節  
挺然少爲文章喜藻麗中年刊落鉛華常寄書李濂曰  
往者爲文多取事實近稍擺脫獨出己意豈大馬齒長  
蓬心漸開耶抑數年憂虞而有所激昂耶修沔陽志當  
時與康海武功志王九思鄆縣志稱海內三名志今其  
書不傳其敘例曰余爲志據諸史傳及故志所載冗者

裁焉鄙者黜焉略者覈焉訛者正焉疑者傳焉其功賴諸子搜較爲多余特類萃爾紀一表四志八傳十有一統十有八卷郡之大事鑒戒存焉作郡紀封爵秩官人物皆爲郡邑重作四表凡志郡邑者民所止也故首提封位署建而制度彰矣故次創設役莫大於隄障民食仰焉故次河防河防固而財用阜矣故次食貨富必有教故次秩祀校者禮所從出故次儒學有文必有武故次兵戎凡傳秩官人物敘事也良牧惠也名將錄功也死事忠也名賢尊德也逸士尚志也儒寓思也孝義崇節也外傳備遺也觀其敘言良有意於出流俗矣紀表志傳擬史裁也然紀體尊嚴不可用於方志方志用紀

必其敷著朝廷德意者也但記一州之事豈可僭紀又州郡之稱自唐以前迭爲沿革明以州縣並隸於府則州不可以稱郡致與諸府無分別也如以史法繩之首篇郡紀二字未可訓矣又紀表志傳史之四體其源出於史遷紀表書傳班氏全史名書則改八書以爲十志鄭樵全書名志則改諸志爲二十略所以分綱目也今全書爲沔陽志則紀表與傳皆志也而提封創設以下八篇又名爲志與諸篇何所別歟然其文筆近古敘次篇目潔而不蕪要亦非恆流所擬者矣承敘所著有內方集今亦缺略不全

陳柏字憲卿別號蘇山沔陽州人童年見賞於州長吏

與童承敘齊名萬厯戊子舉於鄉北游太學結交豪雋益肆力於古與程文德鄒守益爲莫逆交倡明正學累至職方郎中兵部尙書楊博巡邊奏草多出柏手嚴嵩當國柏陽奉其意卒無所屈嵩惡文及例轉京堂出爲山西副使井陘兵備道下車苦旱以身請禱天大雨丁母憂歸士民遮道泣送中忌者流言遂絕意仕進力於學問尤好金石文字所著有見南江閣來青軒詩文借山亭集職方奏稿大業堂尺牘復中語錄河陽人物攷數十百卷柏年六十餘居里中修高年會比唐白居易宋司馬光香山洛社之盛平生恥談人過獎善憐才汲引後進如恐不及年七十五卒長子文燮光祿監事有

才藻次文燭

文燭字玉叔柏之子也少負異質弱冠工古文詩歌登嘉靖乙丑進士授大理寺評事時王世貞李攀龍七子有詩名意不可一世文燭伯仲其間不少讓京山李維楨亦推分相交出爲汝南知府遷四川學使衡鑿精當時執政務爲嚴刻操諸生如束溼薪而文燭獨持寬大能得士心累遷南大理卿值王世懋掌南刑部以詩文氣誼相得癖好奇石多役作爲忌者所中致政歸建五岳山園日率諸友倡和其中六十病卒撰二酉園集  
艾然字然明江夏諸生淡於進取詩酒自豪所居東門外築圃蒔花諸王孫多從之游崇正癸□城陷挈妻子

走避鹿泉山拾野蔬自給後妻死益自放 國初返東  
郭結茅舊址手種桃梅花果而題其居曰萬木園署其  
門曰賣花沽酒讀書務覽大概不求甚解著周易疏無  
一勦說性孤憊見非禮輒髮豎背裂晚年氣稍平易署  
其齋曰待盡庵年七十有三卒

忠義

艾棐字以輔號天游江夏人萬厯庚子舉人辛丑會試  
副榜爲行唐教諭教士有法陞固原知州遷成都同知  
俱有政聲一年致仕歸棐故廬距城百里癸未之亂人  
勸棐徙居棐正色謝之城破語其妻王曰留一子有先  
人祀忠孝全矣言畢與王及子宗濂孫文炳俱投井死

張璞字中美江夏人宏治乙丑進士授監察御史巡按雲南行部無遠近皆單車周視時鎮守太監梁裕爲劉瑾心腹濫取民間各色銀占役軍士割害邊民璞重懲之先是鶴慶同知敖英以貪酷當論劾裕乃與英構璞下錦衣獄刑部主事孫繼芳疏爭不報璞竟死獄中嘉靖初贈太僕少卿

沈倫字彝士號景山天門人順治己丑進士超授梧州知府奉符之官在道部檄赴長沙定藩王軍參謀議甚見敬禮奏疏悉屬焉比至梧梧兵燹後傷殘未復以惠聲招來之天下初定邊陲皆宿重兵有戍卒奪民妻倫念文武未和兵民方求覺欲使自懲之語卒曰爾何敢

然誣耳卽遣去陰使還婦於民民相傳咤倫陰聞於帥  
帥大慚服誅卒徇於軍民情帖然又有舉人爲仇誣異  
志縉紳相株連將蔓延大獄倫請藩府亟趨舉人會試  
其事遂解最入且遷官適孫逆來襲梧倫與鎮將嬰城  
分守城陷不屈死梧人立祠祀之乾隆二十九年 詔  
入忠臣傳祀昭忠祠

方光祀字振先漢川人官陽穀典史乾隆甲午王倫之  
亂光祀率眾守倉獄賊至抗罵不屈遇害事 聞優卹  
入祀昭忠祠贈府知事廕子兆鈺銅山縣呂梁洪巡檢  
尼子義本名兆瑞隨光祀守禦抗賊被害大吏上其事  
爲之更名曰義 詔優卹並祀昭忠祠

艾吾鼎漢川人天啟丁卯舉人官四川興文知縣流賊

陷城爲所執不屈死

明史忠義傳

甘繼芳字體元竹谿人性忠毅慷慨有謀略明季流賊猖獗竹谿爲陝西四川湖廣門戶居民屠戮殆盡餘竄入山晝夜驚駭繼芳糾集遺黎團練鄉勇賊至合攻賊去則治田業得以持久不敗入國朝爲守備防衛中峰左溪繼芳竭力守禦鄉人賴焉康熙十三年吳賊餘孽陽來嘉等據房縣竹山四出攻掠獨竹谿不得破賊愈憤八月連茅廬山霍山洪謝二賊率眾數萬來寇知縣曹席珍以城不可守遂入中峰寨與繼芳協力爲前後二門拒賊糧少賊坐困之至六十日有縣門子曹二

以事受撻賊卒誘之賊攻前門曹二導賊卒自後門入  
寨破賊執曹席珍繼芳奮曰主不降者我也於曹何與  
賊曰今可降乎而曰不可賊曰不降則死曰死吾分耳  
以肩輿昇至五條嶺厲聲罵賊遂遇害其時十月朔也  
年六十四賊方置酒賀賊卒誘曹二者忽據席拊膺大  
呼甘繼芳獻俘卽自撞擊吐血數升死賊大駭越三日  
陝西官兵大至諸賊退保竹山房縣明年官兵大合於  
房縣茅廬山諸賊俱授首事詳殄吳逆餘黨傳繼芳之  
事久無知者康熙三十六年學使王興祚按試鄖陽詢  
竹谿人曰諸生知有烈士甘繼芳乎時繼芳長子霖方  
應試曰若繼芳子邪若父以身殉難忠義不傳何以勸

後其以狀來山是人知其事蓋曹席珍與王同里相善常以爲言而王聞之熟也教諭李標常爲之傳而惜其不得與於秩祀然聞其子孫多有名庠序云

補忠義傳

胡懷字公遠天門人性方嚴崇正時以舉人爲戶部主事寇難潰發所在飛芻挽粟羽書旁午庫藏告匱支持無術懷監寶泉局廉幹勤敏爲考功稱最闖逆犯關莊烈帝殉難朝臣紛紛具吉服投揭鴻臚懷歎曰主辱臣死何用生爲書遺囑付妾婢善撫幼子身縗絰哭臨梓宮爲賊所掠不從死

恆字公占懷同母弟也以舉人官會稽教諭累遷至四

川上南兵備道多惠政甲申賊張獻忠陷成都分兵掠州縣時恆駐邛州兼攝建昌道聞變卽提兵自鎮雅州遣偏將羅大爵救成都而使幕客汪光翰諸生鄔之駱持符調建昌兵援雅調海棠鎮及寧越兵援邛羅大爵戰死兵散九月朔獻忠兵大至援師未集恆與其子之驍及御史朱奉銜指揮阮士奇合力禦之會姦吏王國臣內叛士卒皆走城陷恆與之驍戰死朱阮亦死之耗至邛恆妻樊氏妾成氏馮氏之驍妾周氏僕吳京兒駑來婢二女一門七口皆死之署中死者百口當時以爲臣死君子死父妻妾死夫僕死主惟此爲烈之驍妻朱氏撫孤子峨生以延世祀事具列女傳若汪光翰鍾之

綬艱難百死以保孤卹蔭皆義士法得附書汪光翰字  
文卿婺源人讀書任俠慕程嬰杵臼之爲人胡恆仕川  
南辟爲幕僚畫策內贊甚相善也鍾之綬字楷士與恆  
同鄉里不羈而善游遇佳山水輒蟬聯不返常愛青城  
峨嵋得故人之官成都資其輿馬逮恆秉節臨邛世亂  
多故之綬辭光翰去已而雅州之變光翰聞恆死國一  
家殉義擗標三躍招魂而野哭之遇亂軍潛詢恆後得  
朱氏狀聞關阻梗脛蹠穿潰始得峨生母子所在保護  
維持奉之甚謹而之綬倏從瓦屋山至見光翰泣且拜  
曰高義何獨讓君爲吾死無以見公占於是朱氏母子  
賴之光翰之綬或傭書材鄙或小估市廛崎嶇危難之

中卒得無乏峨生一心聽慈母誨守其祖業垂二十餘年大兵平四川巴峽路通光翰乃身送朱氏母子歸鄉人咸太息泣下高朱氏之節美汪光翰鍾之綬之義時之綬已客死昆陽矣

孝友

陳一拯字心一應山人父之良自有傳一拯穎博強記下筆數千言刻厲名行以古人自期許兄弟八人非一母出家庭或有閒隙一拯能調劑之不見其罅父卒哭踊如禮所遺衣物兄弟爭搜括之一拯推臥不出勉諸昆襄大事不問家人產文藝日進學使拔置高等兄一捷爲諸生性矜上一拯名列其右輒投筯管有弗當意

輒終日怒一拯怡顏受之無敢稍忤一捷且卒以遺孤  
惻及兩女屬一拯爲盡力嫁娶惻放蕩無賴一拯多方  
誨迪弗悛泣告兄靈至廢寢食然卒無效惻妻憤惻無  
良纒死妻家以一拯故弗究惻益縱酒恣博積負不得  
鬻產償則遷恨一拯子愚又心妬愚才欲甘心焉愚一  
日遭迫幾殆倖脫去泣訴其母張張以爲患一拯若弗  
知也俄惻至跪愚於庭責數之曰若奈何弗善事兄操  
杖臨之惻內作爲請貸因而釋之曰汝再犯兄不汝貸  
矣惻亦心動不復尋仇後挈其妻子逃亡於外客死一  
拯命愚蹤跡遺孤爲置產授室弟一撥先出爲人後所  
後產盡思復一拯首割腴田爲昆弟先一援侈產復盡

一拯又爲置田一區屢置屢廢至於數四不稍惜也一拯有田與少弟鄰個人侵界一拯讓之弟或以忿戾相加一拯第笑受也曰昔人訓弟欲使唾面自乾何況爲弟所唾弟爲感愧課子甚嚴或謂太苛曰百過成於傲也萬厯己酉愚舉於鄉語妻張曰兒小得意須時有厲聲收其放心晚以貢生官黃州訓導與諸生砥礪名行若晏清李五美商論今昔不倦時分家粟食諸貧生鑿識鄉謙甄淑趙貞吉周三俊嚴師範邱家魯及惟明惟時等皆有聲聞同官忌之值推官勒取學租將累貧生一拯力爭之因中飛語罷歸送者或爲不平一拯曰教官教諸生不屈諸生以媚人是吾職掌不得其官則去

是吾本懷於人無與何所容其不平歸家置義田贍族人之貧族人子有外鬻者贖歸爲之嫁娶餘廬盡以居貧子弟相待舉火者凡數十家族人服從其教有故未嘗以詣有司萬厯甲寅卒年七十有二門人私謚曰節孝

愚字元樸性至孝自幼無忤容父卒廬墓側疏食三年鄉舉後九上禮部不第嘗自矢曰大丈夫當以天下爲己任安能爲五斗米折腰也故終於公車不仕學使某題曰孝介先生檄縣祀於社有三子其季仰可順治庚子舉人

彭職字仲秩沔陽州人敦樸修內行母早世事父曲盡

孝養父疾篤職親嘗糞以驗生死兄嫂逝世遺孤三人  
教養婚娶愛若己出泛愛及眾僕有次當爲人後者卽  
命之歸廣施藥餌力濟貧乏至老弗怠雖委巷閒談必  
引功罪感應事實誘人於善

夏展成字舒齋黃陂人能孝事繼母肄業國子監當敘  
官展成思親遽歸歸而母果廢疾身親扶持經年不怠  
母夢神語憐爾子孝使汝疾愈覺而起行如故聞者異  
之嘗買婢詢知良家女因荒被掠卽善嫁之族人鬻出  
廬於展成遷居光山值荒疫喪貲而歸卽還其券里有  
不養其母者母欲訴於展成其子慚謝曰何可使夏君  
知遂改行爲孝

阮文山字學昌黃陂人少孤母吳守節終身疏食已亦疏食終身撫兄孤子勸弟文斗學俱有成勞於治生母在未嘗行百里外及母被旌建坊文山奉母拜年五十矣猶嗶笑作孺子狀母卒二十年謝家事於坊基間築一室舉父母像而祠之月朔誦蓼莪詩淚泫泫不已

楊萬選字子全應城人性孝友篤於內行父母兄嫂相繼歿世萬選每言及輒流涕終身弗衰家稱溫飽好施不倦同姓有貧者必自減損以恤之其穎慧者必曲成之賴者甚眾至於施棺以安死者剖產以贍孀居則不必盡族屬也有人背其德者萬選不以介意鄰人治室侵其居址萬選不計旁觀爲之不平萬選詭辭解之人

以是服其量萬選善辭說能排難解紛有兄弟因財而訟者得萬選一言悟而相讓竟成雍睦萬選少習勤苦雖處豐腴未嘗自暇逸子弟諫之則曰服勞則逸念不生此治心法也卒年八十有三無疾而終

王國封字靜齋天門人童時入塾師授孝弟章句輒色喜往復不厭父文炎敦倫尙義同祖兄弟九人共爨食指甚繁支持甚瘁國封棄舉子業牽車服賈以佐其父累年家稱小康而身無私財兄國均官沔陽訓導前後十五年官署所需皆取給國封乾隆己酉國均有疾國封馳視竭力調護以體羸過勞兄愈而已病遂卒年五十有五國封嗜義戊戌乙巳大饑長吏賑粥三月國封

勤事甚勤老弱殘疾閒有振不及者私貲濟之全活甚眾佃有窮困鬻其子者爲捐金贖之嘗有偷兒入室被執鄰人子也諭以義贈金而釋之終不言其人有里人病劇子幼託以千金後子成立戴其義事之如父

段而聘字儒珍江夏人衡山訓導燦子也攻舉業善書法九蹟棘闈未售律已方正孝事繼母夏夏性慚急稍拂意卽挺擊橫施家無完物而盼率妻高兢惕奉之能得其歡夏攜前夫子二而聘愛之如親兄弟夏卒感爲和豫嫂袁二十而寡無子女而聘夫婦敬事如母數十年如一日而聘授徒四十餘年多所成就著有竹鳴偶錄殖學堂便筆詩草子追文優增生亦能詩孫四人其

仲先達乾隆壬子舉人嘗因父病禱請身代

岳重霄字會雲學名凌霄由明生員承奉岳忠武王祠祀性至孝幼遭寇禍母被兵刃其頸而未絕重霄願身代寇義釋之母程氏旌表節烈載列女傳明舊立忠武祠於江夏題製祀生明季兵燹祠爲僧踞改一指庵重霄痛祖祀湮沒於康熙十一年籲請院司清復至今不絕

向氏三子黃梅人兄弟三人隨父客江湖父死奉其母吳寓居武昌後爲武昌人貧無以爲生請業於母母曰天下惟非義辱親事不可爲至於資生惟力是視雖賤技無不可者三子於是各習藝以養母財入不自私惟

求所以承歡無所不至母病竭力治醫藥家無長物力  
幾不支母且死言若兄弟貧甚喪不求具掩體足矣已  
而三子不忍薄殮貸棺於市之富人市人哀之爭勸富  
人貸資凡附身物力能致者畢具比三四日水漿不入  
口家畜貓犬亦皆不食市人多爲感動皆斂資助其貸  
棺富人爲德不卒急索所貸至於詬詈三子泣請曰寬  
我數月當鬻技償之爲我母安敢辭詬責邪遂受其凌  
誅不敢校三子長曰元之次平之次清之平之子卽廣  
文

田蘭京山諸生性純孝隨父廩生在田讀書白谷洞洞  
鄰深潭潭險峻乾隆辛丑夏雨泥濘在田率蘭歸家失

足墮潭蘭繞潭哀號躍身入水家人聞而求之不得祝之蘭負父尸以出含笑如生縣人哀之立碑潭上署曰孝子潭

林德明字二如號鏡湖漢川人乾隆癸未進士著有鏡湖文集未仕卒德明幼穎悟爲文出入經史裁成後學能各盡其長黨游庠序登賢書者往往出其門下性和平於人無所忤然不可干以私以此多不諧流俗士林益推重之湖南吳思樹名進士也先是北上遇德明旅邸言而有契辛卯吳自京歸道經襄陽聞德明卒嗚咽流涕欲千里赴弔爲同行者力阻而止吳任岳州教授招德明子孔曹肄業其署教誨而飲食之德明篤於孝

友父逝侍母姚色養備至年八十有六先德明四月卒  
德明病迷罔中嗚呼尋母如嬰兒見者莫不泣下待昆  
弟友愛一食之甘必招與其於族眾無不睦善族叔某  
某任族事爲眾推服一月兩課族子弟續修林氏譜皆  
資德明孫祥紱乾隆壬子舉人

史玉明廣濟縣人父早喪傭工養母時遇雨彌旬不能  
具蓑笠輒泣禱天爲之霽或方傭而雲合呼搶恐飢及  
母天必復霽每出傭必負母至田便於進食愉容勸侑  
母未嘗不爲之飽母卒築舍墓側霖雨積陰蛇蝎侵枕  
塊無畏容一日遇虎玉明揖之虎亦諦視玉明徐去鄰  
右勸其遷避則曰先墓在此寧爲虎食不悔也玉明死

鄉人置田建亭春秋祭奠祀忠孝祠康熙甲戌黃州通判董維祺表其神道合名其地爲史孝子牌

僧春谷不知誰氏子雍正閒祝髮廣濟縣東衡山一枝庵爲僧有母衰老迎養於庵母病危革春谷憂甚山絕巘有真武祠素著靈異匍匐禱求身代共山有捨身岳岳下峭險絕壁萬仞俯視黝墨慄人肌膚春谷禱訖投身其下傷未殊死鄰僧見而昇歸母病遽瘳春谷亦漸平復此韓愈氏所謂墨其身而儒行故不入仙釋而列於孝友亦孝之過乎中行者也

衛遠南漳諸生例授州吏目性純孝母早喪事父能竭心力父喪廬墓嘗著人子願體錄以訓子孫自起居服

食娛悅親志以至侍疾慎終喪葬大事皆以平日所得於事親而可爲後法者凡二十七篇皆懇至詳盡今傳於世乾隆辛巳旌

彭商賢字齡遠長陽諸生幼遭逆藩兵亂父母早世牽連家難挈弟妹避外家年方十六子身閒關走峨眉已潛還家亦遂落兄弟篤於友愛弟妹寄葬陵舅家舅有女許字其弟有成言矣已見其家落中海商賢察其意則慷慨曰弟何遽不得婦乃背負弟妹而歸業儒補諸生爲童子師歲暮主人致白金二十兩爲贄且期以來歲商賢謝罷刲羊屠豕大置酒徧召里人盡其金而去去而爲賈所居成聚累致萬金隨手散去意豁如也縣

故有先師廟卑陋弗稱規制知縣和剛中欲有興舉議者難之商賢釀數千金成之制乃大備嘗試於鄉不得舉而是時諸生許文武互試商賢騎射獨出見者辟易又不獲雋由是絕意進取以孝友型家季父文錦無子迎養如事父文錦卒一切殮葬皆厚暮年無子用千金造宅既成顏之曰紫荆俾弟祖賢主祭曰吾祖宗之舉人也弗可以鬯卒以祖賢仲子淑嗣淑乾隆庚寅舉人官江西知縣有政聲

祖賢字齡遐一字述齋少商賢五歲避難舅家事定乃出與商賢先後補諸生力學自相師友商賢已去爲賈祖賢益發憤攻苦授經里中多所成就屢躋場屋而文

日有名家亦稍裕縣長吏聘主佷山書院人號名師以  
恩貢揀選教諭商賢卒遂不復進取年高德望日隆府  
縣長吏親式其廬祖賢終歲不一通謁乾隆壬寅年七  
十有六祖賢自少至老未嘗一日廢學當避難外家夜  
寒無燈火輒步廊楹記繹日所誦書每至四嚴事繼母  
董以孝聞與商賢愛尤篤賈時商賢嘗謂之曰吾少時  
揮霍田產皆賤售於人然田業吾兩人所共向書契獨  
一人名是余一人責也今幸有餘財弟可贖之吾自當  
任咎祖賢曰贖產而貽兄不直之名所失多矣卒不贖  
孝義

李義茂江夏人事母至孝嘗刲股愈疾後母亡甫殮適

獻逆陷城舉家避去茂獨寢苦殯側賊詫問之曰母殯在堂不忍去也賊嘉之立大纛其門爲衛鄰里知者多扶老挈幼潛匿其室及宅後塘中後皆無恙羣拜之曰吾儕恃孝子而生也至今猶名其所居爲孝子巷

楊宗震字四知江夏諸生性至孝獻賊屠城宗震負母陳出爲賊執欲兵之懇以身代賊義釋之夜負行五十餘里復失父返尋獲之復遇賊欲刃其父宗震奮抱賊臂父得脫賊怒傷其顛幾斃闖賊屠城宗震奉父母匿山谷中會歲歉行野拾菽麥以養母病侍湯藥竟夕衣不解帶母卒結茅墓側者三年父卒哀慟呼搶謂人曰父母旣逝吾將安適自是形神憔悴以死

孫日旋字敬亭父自休寧遷江夏日旋中順天武舉性至孝父病祈以身代父歿廬墓十餘年授松江千總旗丁有婦少寡遭事不白欲自縊日旋力白之客舟有鬻女完逋者解裝贖還之遷守備念父三十餘居已四十喪偶亦不娶

陳文炳字若采江夏人天性孝友父疾得異人授方必某山某草乃治文炳卽冒風雪重繭求得服之良已父歿廬墓三年繼母患癰吮拔其毒愛異母弟妹悉愜其隱弟天撫孤養益厚乾隆七年 旌

劉宏勳江夏武生早喪父母事祖母梁

見烈女傳

孝奉祖母

江行暴風舟敗繩縛祖父於背左右挾兩舳板奮力出

沒狂濤遇救俱免遠近驚傳爲異嘗還人遺金祖母卒  
葬廬墓有馴犬守廬乳雉求巢鄉閭異之乾隆四年

旌

熊承裔江夏人年十六值夏逆之變扶祖出城遇賊欲  
兵之奮身求代不許奮刀自就額血溢面賊感釋之追  
及父母逃山谷中祖與父俱病危禱天求奪已算延之  
皆不藥愈祖歿廬墓三年父歿事母盡孝母目有翳禱  
於神以舌舐日日七次逾月復明又患癰吮盡其毒不  
十日愈旌

夏士友江夏編民幼孤業薙髮養母每天寒必親炊奉  
食牀前母食訖然後起二十年不改年四十無妻里大

姓某有妾不容於嫡嘉士友孝以妾嫁之婦歸日與姑  
詬士友訴於大姓涕泣出之年餘士友卒母年七十矣  
哭之甚哀母之不托終也遽詣其家匍匐母前請爲義  
子厚奉養以終其身

郭儀江夏人母李氏生儀未兩月卒父再娶李氏生六  
子愛儀倍已出儀奉後母以孝聞嘗晨起捕魚拾遺金  
一釜於湖中以足掩坎仰天祝曰天乎如爲儀財請從  
生理中得之歸家告妻子平居持一木槎里人有鬪輒  
杖其不義者人敬畏之

李德智字太癡江夏人生平薄名利好黃老養生術偶  
見客倚門若將有言詢之則銅鼓衛軍輸稅都司中途

舟覆失其文移將歸請之欲寄帑德智便輕身往返德智許之相期以四十日其人去死於路遇所知告喪其家比喪歸備勘官錢無有疑告喪者匿之獄具當死德智待其人逾期不至遂以所寄詣都司都司以文下衛則告喪者方在獄官爲驚歎急釋其人德智夫婦俱解養生家言婦尤精進德智語及眾事婦輒訶之德智年八十九卒

程聯槐字三台先世由徽州遷江夏金口自高祖之寧曾祖懋允祖兆堯父士暘至其身五世同居人無閒言聯槐念族眾人多建宗祠立祭田修輯族譜以聯屬之慷慨好施每遇歉歲煮粥以食餓殍製棺槨以恤暴露

修要路之橋梁凡十餘處又欲捐田爲學宮師修費及  
贍同縣諸生科舉資糧勺庭書院膏火忽遭疾卒其子  
貢生雲炳雲煌雲煥於乾隆壬子克成父志捐田繳契  
款剖爲長計焉乾隆五十九年紳士呈請當事旌題  
熊倩應城人孝友能文弱冠補諸生弟爲諸生以貧徙  
業爲買倩斥己產助之父老病十年倩扶掖不去左右  
嘗游武昌同舟人遺金五十倩坐守以待已而其人訪  
至封識如故乾隆元年舉孝廉方正未仕以子飛官千  
總封六品階

譚綽歸州人明季挈妻子奉母避亂寇逼勢不兩全棄  
子負母以逃中道母飢妻鄭乳哺其姑卒得保全母年

九十乃卒綽子孫至今繁盛

李際運字楚璵應城人幼穎敏爲諸生文辭捷給父兆鼈行誼甚古屢困於貧諸弟方幼際運以年長佐父支柱晚年家漸裕推甘諸弟不有其私母卒善事繼母有司舉其優行聞於學使兆鼈業醫際運亦精其理兆鼈嘗篤疾際運脈之而憂禱天乞以身代兆鼈遽愈然際運卒於乾隆壬子年止五十有五而兆鼈卒享年大年

熊倍仁字心畬漢陽人故學士伯龍後也孝友能文以拔貢入國子監文行信於儕輩乾隆壬子舉順天鄉試又以八旗教習引見授知縣明年試禮部下第南歸意忽忽不樂中途恍與神遇遂得奇疾所言不類人世

事抵家見父叩頭流血數日歿年三十是年會試下第死者多見鬼神變異陰陽道殊莫能明也

王成民字九韶東湖諸生幼失父母兄嫂遇之少恩成民恭謹有加勵志讀書有以自立年三十病療幾危獨處靜室絕聲色寡言語薄滋味養生愛氣至年五十精神復壯閱七八十白髮顏丹耳聰目明則行之有常也兄嫂歿世喪葬盡禮撫教孤姪恩勤兼至兄弟二人已子一三分其家不以自封課子甚嚴稍違則戴坐机貯水滿盂其上或刺臂血出其子發部牟能率教以諸生授恩貢

吳宏培字新成號謂村潛江人十二而孤家貧竭蹶奉

母母教極嚴培有過母輒弗食長跪謝罪必得母歡方起終此日不敢出戶庭性善飲嘗飲酒過量母限以四觥培終身不敢過母患風痺淹滯牀第培服侍晝夜不假嫗婢三年母竟伏杖而興逾年康健如完人人謂培篤孝所感母歿廬墓三年有司欲以 上聞培力辭不果

### 五世同堂

萬廷模字孔範江夏人先世萬貞保明雲南指揮掌印平蠻有功世襲指揮同知 本朝恩子世職運漕雍正初停襲父朝譜晚得廷模廷模甫冠而孤事母徐克盡孝養好學能文試不遇以例除福建漳汀巡檢服闋再

補興化巡檢屢著循聲上官才之嘗命攝寧化縣事膺  
卓異薦終以微秩不得展其夙負家居矜持名節福建  
大吏舊識廷模名移節湖北折簡召之廷模謝病不赴  
家故饒裕疏財好義在福建首捐貲造豐順寺大橋後  
居家創便河塘板橋皆工繁費鉅廷模力任成功京師  
會館本縣學舍里社義倉皆踴躍任之又建萬族宗祠  
以聯族屬置祀垂久遠焉乾隆戊戌乙巳歲祔以私財  
助賑聞者興起全活甚多廷模生康熙三十二年癸酉  
卒乾隆五十六年辛亥年九十九妻姜氏先卒於甲午  
年亦八十廷模卒時長子年八十長孫年六十一矣及  
身有子四人孫二十二人曾孫二十四人元孫三人五

世一堂門庭雍睦入鄉校貢國學者彬彬繼起鄉黨推  
之乾隆五十五年逢 國大慶大吏以五世一堂上  
聞給錫慶衍齡題額頒賜緞絲粟肉如制

孫應賢應山人年十二父母俱亡哭奠如成人依於兄  
嫂家貧事農賈後家漸饒凡父兄遺事皆力任之其子  
姓男女婚嫁多倚賴焉首建宗祠置祭田聯宗族誼祠  
宇橋梁街衢溝澮有傾圯者輒捐助之凡戚友宗族有  
婚喪竭蹶來求助者必愜其望凶年賑其宗族親戚自  
壯至老終始無倦與其妻韓並登耄耋有子八人孫二  
十餘及見曾元五世一堂有司表之應賢以農賈起家  
至其諸孫曾業儒入鄉校者五人次子紱以孝聞

絀幼讀書不成去謀生業部署皆中度性至孝自少壯至孝凡涉父母事竭盡心力惟恐一不得當家初貧父母有所需雖甚難必百計求之務得而後已當寒冬衣被不給而飲膳必豐及家漸饒未有居室先創宗祠諸昆弟欲稍緩則曰此父志也父母皆九十餘痿疾艱動履幾二十年後負行扶立衣被雖極污穢必親澣濯父母憐之至祝天請速死以紓其勞絀慰父母樂此不疲也居喪年已六十嘔血盈升哀毀骨立既葬朝夕省墓涕泣三年未嘗一日閒也夜則臥父母舊寢每風雨夕鄰里或聞哀哭聲如兒嗝行路皆爲心惻年八十餘猶懸像於室朝夕必奠有事必啟而後行稱曰孫孝子

熊魁楚字斗公京山人先世自南昌遷京山世業耕農魁楚弟兄五人四爲諸生遂以儒顯魁楚性孝友祖父遺產無多已以授徒起家季弟嘗請分田魁楚曰弟所欲者取之毋居分析名析則弟力不能自支也於是徐資給之以田與弟而魁楚爲納賦稅及後析戶弟始知有賦也自崇正丙子至順治乙酉累試鄉闈不售以歲貢候除教職終老不出嘗自敘生平謂愧擬昔人讓爵讓封而絕甘分少不敢不勉愧稱柳下魯男之貞而生不二色不敢失持愧比鵝湖鹿洞之教而殷懷無倦不敢自私亦其實也康熙己酉卒年八十九入祀鄉賢子以謙知名

以謙字皆六兄弟三人以謙居仲伯季俱早世以謙撫  
卹遺孤同居不私財利析產則讓腴受瘠雍正三年以  
歲貢授鄖陽訓導卒年七十有三子純祖繹祖有聞於  
時

純祖字遇願幼從祖學甚不慧一日被笞眩仆於地吐  
痰數升自是生性開闢作文輒有精思補諸生學使屢  
最其文多刊之爲試士式又敏給於文日可得數十藝  
嘗游漢鎮鎮多鉅賈有大家喪諸賈請爲挽辭旣應之  
矣俄江上大風阻往來舟諸賈夙約江南岸名士爲文  
凡十餘幃逼於時不得達咸起揖純祖純祖口哦手書  
咄嗟立辦文筆字體各爲一家無雷同者人豎稱之然

屢困鄉闈以歲貢終其身乾隆己未卒年六十三

繹祖字定思初名翼祖試童子時府榜發府吏誤翼爲繹父以謙適感異夢遂易今名幼穎慧五歲授經如夙誦者十歲能行草書二十補諸生累試不遇雍正乙卯選拔爲貢年四十矣考授州判試用直隸屢攝委吏末秩不自菲薄長吏往往憚之上官假以廉訪州縣繹祖持大體不爲察察上官才之補開州州判首建宗程書院以培士風聽訟明決鄰封小民多越境求理擢三河知縣薊州知州天津知府皆有德政畿輔官吏每遇巡幸供灑埽役時得召見上一見繹祖卽識其名擢登萊青道會 上東巡升中泰山泰山高峻向修馳道

皆構空爲梁費繁勢險繹祖始鑿磴道土漫其峻迤邐  
平升 上甚嘉之調肇羅道請豁貧民墾荒山賦四十  
餘畝擢貴州按察使攝布政使事望誤免官旋給道銜  
京山知縣請主塗山講席蓋自魁楚至繹祖祖孫三世  
四人厯主塗山書院縣人傳爲佳話繹祖有子二人孫  
六人曾孫八人元孫一人大吏以五世同堂上聞 詔  
賜杖朝集慶題額乾隆丁未卒年九十有二子璋才長  
應變屢佐繹祖理州縣事後官齊東知縣

熊鍾麻城貢生孝事繼母徐友愛繼母所生如親胞裏  
母慈撫諸子無閒視門內稱其雍睦鍾兄弟六人皆能  
盡子道諸孫九人曾孫四人元孫一人乾隆五十四年

有可以五世同堂牒報大吏

孝子

陳述知字稗彭江夏人。生而穎悟，崇正末年以貢生授九江推官。癸未獻賊之難，父明域戰賊，不屈赴水死。述知挂冠歸，絕意仕進，奉母避青山，孝養至老不衰。順治己亥，當道聘修湖廣通志，會海氛起，事寢，退刊楚會存書所著有讀史偶見、大易偶見、四禮訂疑、山居紀異、湘東子集，藏於家。

吳元俊字千人，號鹿泉，江夏人。以副榜授辰溪教諭，篤內行，居喪泣血廬墓三年不變。四十喪妻，終身不娶。邃於掌故，通志縣志多所排纂。主講江漢書院，人士奉爲

稽模所著喪禮確遵錄參計四禮翼北涇語錄學庸通  
言周易貫通解自訟錄河洛圖解香浮堂集相規堂集  
鹿泉集相港別業楓香堂手稿十數種藏於家

孝子阮啟岷

阮啟岷黃安生員明季流賊掠黃安其家人倉皇走避  
村西北之上竿山時啟岷甫九歲爲賊所得正立拱視  
了無懼色賊異而縱之上竿山砦破戶盈山谷啟岷父  
歸失其母徐啟岷呼搶欲絕久之或言其母在異縣又  
見其鄉婦女有自遠歸者卽叩頭別父請尋母父止之  
不得則攜一僕與俱編古二十四孝及夫妻子母亂離  
事爲俚曲行乞於外且歌且泣哀感路人又故爲詭怪

新棟婦女觀聽冀幸遇其母所歷州縣以十數寒暑三  
易至聲嘶踵裂艱辛萬狀蓬門朱戶蹤跡無遺竟無音  
耗不得已歸形容憔悴雖家人莫之識也乃與父相持  
大慟聞者皆爲流涕後每一經山必徘徊其上潸然出  
涕曰是其妃乎吾母安在吾望之也遂自名妃又爲詩  
自傷詞旨悲惻人比之蓼莪云曾孫林遠有孝行人呼  
爲小孝子

小孝子阮林遠

林遠字星吉國子監生生有至性不妄言動羣居汎愛  
未嘗以己意有所是非十二歲母盧病乳日益劇林遠  
侍湯藥刻不廢離延醫數十皆云病不可爲夜靜禱天

所以身代一夕夜半恍惚見其祖母梅授以藥曰用此  
當愈以手授藥實無藥也而香聞一室疾竟獲痊一時  
人士翕然稱之曰小孝子子夢夔乾隆丙午舉人

補遺

張舜民字芸叟先世洛陽自張諤官鄂州致仕家於江  
夏徽欽之難祖樞密叔夜父棟祖母蔡母王闔室殉節  
白溝河舜民時年十二亦將赴井大將張勇抱持慟哭  
敵人哀之釋去勇奉舜民奔江夏靈泉山力耕以給鋤  
地得金鉅萬乃聘致名儒講求性命之學立祠刻先像  
日夕拜酌終朝踊哭不絕聲理宗時授知縣著有南邊  
錄子文淵文潛皆有文行居官以循良著

義行

劉大木字立之漢川人饒於財慷慨好施五十無子廣修橋梁遂育一子名橋生再修佛寺更有一子名佛生歲儉爲粥食餓者所活甚眾正德嘉靖間捐貲建漢陽府及漢川縣二學櫺星石門柵置本學明倫堂敬一亭地址當世稱之大本初未有子撫張緒爲子故緒初從劉姓名燧後爲理學名儒又撫從子烜爲嗣後亦有聞於世燧本農家子烜亦貧賤大本皆識之於童幼人服其鑒別焉後自生二子而待燧烜如故大本沒已子方幼稱閭里桀黠之徒謀噬遺產百計傾撼勢甚顛危燧力護幾於不勝知縣昌應會力保全之始免於難初成

都有宦家弱子隨父官長沙至洞庭遭風覆舟全家盡沒遺孤丐食於途因投大本大本器之改名爲煜教養與燧烜無異視後獲鄉薦至京師與昌應會同邸舍相友善每言大本行誼昌爲感動昌適任漢川值劉氏家難昌素知底蘊故力庇其孤橋生長名輝交游多一時聞人佛生長名炳輝婦宋以節行著二子康恕俱能善事孀母家漸落猶能鬻田以修學舍不墜大本家風烜字用晦生有異質幼育於族父大本大本卒後其所生子幼烜教之不流於習俗大本居縣東百里周陂富有田土築隄捍水歲收萬石至荊州沙洋隄成周陂受水劉氏生計日蹙烜卜居阜角市授徒爲業性端謹恥

談人短遭少年羣不逞於途卽引避之巖牆險道不敢  
置足聲色貨利若將挽焉爲諸生久次當貢有吳生者  
篤老而名次在後烜讓之學使嘉之檄旌其門吳客死  
京師烜告同鄉薦紳爲治棺殮以歸除黃岡訓導折節  
延攬遇貧士輒解衣推食少與張緒同撫於大本張緒  
訪耿定向於黃安烜從執費受業上官察烜明吏事按  
比戶口振廩救荒稽覈帑藏咸以屬之俱有成效有劉  
汝國之難徵發如雨烜捐貲供簿書費擢大治教諭開  
封教授漢陽蕭某爲督學與烜戚里或丐爲居閒烜拒  
之稱疾不出人嘲其迂左遷周王府教授萬厯辛丑卒  
七十有二

張應聘字象賢江夏人生秉慧質性孝友偕弟應宿讀書九峰山寺寢食與俱至老無閒明末中武舉左良玉聞名邀之仕避匿不應闖賊使人脅之引病旬日不食賊知不可乃已應聘方餓病俄有少婦願與偕行辭之不可出一器強應聘食力挽之起遂朝夕扶攜病旋愈將至家婦忽不見乃驚爲神自是隱九峰躬耕授讀無用世意性樂善好施順治九年旱饑里黨賴以舉火者數十家而身啜糜粥斲野草張某幼孤豪奪其產應聘力庇之卒復其業扶弱拯困鄉黨忿爭力爲排解雖捐貲不吝也嘗夜遇盜具道姓名盜驚顧相戒毋犯且護之歸卒年八十有三子其仲以修字博綜質敏能強記

讀書一過不忘早歲能文會吳逆之亂棄舉子業隱居  
教授孝友敦篤樂施與鄉里有貸其不能償者輒焚券  
後家日落惟資館脩備甘旨餘則以周里黨之貧至屢  
困匱無悔也或侮之輒遜謝弗校至名義所在執持不  
稍畏愒體弱而聲如巨鐘嘗夜遇虎疾聲叱之響震山  
谷虎驚駭逸去晚舉二子督教甚嚴長若良早卒次卽  
若衡

呂希尚字枚卜應城人世楊家澗讀書黃金臺寺四面  
環水非舟不達寢食於中爲文警拔世亂不求仕崇正  
癸酉後歲祲亂起獻賊三薄城大家相率入保招希尚  
希尚曰流賊朵頤久矣乃爲釜底魚乎勸族鄰出粟結

壘自保已破產先之部署鄉民指示方略皆得其任丙子冬獻賊屠城濟南得無虞入國朝以子官贈修職

郎子勦周

勦周字鼎彝以歲貢授縣丞聞母病日請急歸一飲食必手致無故不去左右居喪毀瘠弔者幾不能識順治戊子上官羅致名士延勦周尤力峻拒不可銜之俾吏以碎檄誣之將抵罪吏母泣曰我耳熟呂孝子何枉也吏不忍爲白其事環宅泮水故顯宦業也放水下流民田藉潤歲納渠租數百斛勦周得之規牛隄口啟閉蓄洩屬後人曰吾不能嘉惠鄉里此渠濟數百頃早澇勿令納租縣南居民今享其利三子璠瑤琨俱貢生琨字

砥非康熙壬午貢生己巳歲大旱不逞之徒結黨爲盜  
父方寢數十人夜撞門琨聞挺身出叱曰勿驚吾父卽  
飽囊去盜見其氣豪貌壯不敢肆橫始與諸生王秩常  
交王家益落及病且死子幼琨日夕撫慰爲治醫藥比  
卒親爲沐棺治斂旋撫教其子成名昏配家故多藏書  
琨構樂志園更積數千卷旁植花卉春秋佳日徧招親  
友尊酒唱和當世稱之子堂

張其法字有常黃岡監生輕財重義周卹貧困無德色  
居嘉魚村村有大隄長三十餘里水輒衝決爲民田災  
乾隆癸亥其法言於長吏長吏屬以首事其法巡視形  
勢曰渠隘不容水漲是以易潰請疏隄內潰地以拓渠

面則水有停蓄不至橫決爲害長吏然之今爲邵公新隄以知縣邵豐鏞得名也由是四五十年無水患又請除所拓地稅額不累於民子貢生作楫好善樂施能繼父志

尹良時漢川人官鴻臚寺序班嘗糾鄉族爲義倉而設條目十有三事使行之可久由是環池口而居者數千家每稔歲得取給焉事具李維楨記中爲人敦樸寬厚前後四赴鄉飲

郭遙天門人早喪父家口日繁母令諸子分爨久之諸弟皆零落遙獨任養葬鄉黨族戚緩急必周有偷兒入室遙獲之則里中少年素識者也贈貲勸使改行其人

感泣終不洩其姓名歲歉有鬻身活父母者詭姓名請  
爲僕遙覺之還其券其人已聘有妻而難於娶遙復爲  
完其婚

胡靖國字賓華鍾祥人少負雄才讀書通曉大義不屑  
屑章句業旣失怙兄弟五人以靖國善經營俾治家事  
拮据數載家遂饒同居合爨食指日繁而羣從子婦一  
聽於長閨門雍睦數十年無閒母以壽終時靖國年已  
六十執喪骨立聲嘶見者憐之性慷慨尙義里居族姓  
閒有緩急謀之無不濟有人貸其金累千百折閱無以  
償其人慚謝靖國善慰之且爲經紀里黨稱其厚所居  
石牌爲鍾祥一大鎮煙火稠密乾隆己亥歲大饑官請

賑猶待報靖國糾同里有力者捐貲設粥先食飢者靖國捐數千石爲之倡區畫周慎爲別老幼判男女條理井然所全活甚眾援例授知州未仕卒年七十二

尙義

補尙義傳

蕭時英字樂三漢川人父興國順治丙戌舉人會試副榜歷順德府同知有六子時英第三年十三補諸生十六父歿弟文池年十五補廩膳生爲人誣訟時英破產雪之又以己分田產剖半以贈文池已而兩兄三弟相繼卒時英一身支持六門家政遂無心仕進家素豐勇於爲義雍正丙午丁未戊申年疊遭大水皖隄沖潰時

英承役完修闔垆居民賴之居家甚敬黎明卽起雖獨坐必整衣冠盛暑不袒裸晝不入內出入必告其先自奉儉約戚族有貧乏者竭力周之人稱長者子三人長光祚光祚生文沅

文沅字芷南國子生年十二應童子試卽知名因父母多疾精求醫理躬親湯藥父母皆享遐年醫理旣通外人有求治者沈疴立起富家僅取藥資每歲捐貲製藥以濟貧者閭里賴以生全凡數百人家素豐裕親舊積貨至數千金不存券記曰恐子孫貧爲人累也居家儉樸親友往來必情文周至族中惡少年或羣起詆侮文沅善遇之其人感悟卒爲善良性嗜讀書族有聰穎子

弟貧不能卒業文沅教誨飲食孜孜不倦有妹適陳氏  
早寡無子病甚文沅迎養於家陳族且以謂不起也瓜  
分其產及病愈文沅屬其弗理已贍之終其身僕婢役  
久聽其自去不計券直晚歲家貧節儉自持而義利之  
辨甚嚴訓諸子曰吾家屢世豐足物聚則散理之常也  
惟忠厚之道詩書之澤不可替爾有六子其第四子林  
乾隆壬子鄉試第一

王之乾黃安監生生崇正丁丑卒康熙丙子敦樸古處  
落落寡合爲人長者而才幹爲鄉黨所服夏逆之亂鄉  
有惡少素强悍潛招無賴通賊爲聲勢遠近震懼一夕  
數驚之乾約鄉勇保護一方及賊殄滅惡亦爲眾所攻

事平惡族反誣之乾官司察其誣始得無事家稱素封  
妻孟有賢德輕財好施宗族貧乏者多賴之之乾嘗爲  
有司賓禮延鄉飲賓

周崇禮字疑元隨州人初仕印江典史以清慎稱再除  
瑞安主簿值海寇圍城崇禮守東門門外有避難鄉民  
數千主者戒嚴弗敢納崇禮曰此孰非赤子忍棄之寇  
刃邪立命放入全者無算後擢福寧府經歷謝歸悠游  
娛老崇禮家饒裕樂善好施其子嘗入市失其金簪崇  
禮知攫響者終不肯言方謁選京師主某家夜有盜起  
大肆劫掠有豔婦倉皇竄崇禮室求庇崇禮急覓他室  
藏之而身仍故處不交一言且日訪還卽主家婦也崇

正乙亥卒年五十有六子五人次子宗成知名於時

宗成字啟寧母方娠夢神語有異兆覺生宗成生而穎異弱冠補諸生從父仕宦多所襄助父歿弟宗文幼宗成與兄宗昌兄弟奉遺命同居值寇亂攜家避於州城度不能守卽奉母縋城出城果陷避亂江夏復奉母歸里而江夏旋陷人服其先見也癸未甲申之閒中原鼎沸所在無堅城宗成散家貲收召豪勇結山砦練鄉兵部署什伍森嚴有法賊不敢犯河南少年有挾多金求庇者事定遣歸悉還其金順治丙戌學使課諸生奇宗成文拔前茅補廩膳生宗成居家孝友父歿弟方幼兄歿兄子亦幼俱力撫教不稍歧視富而好施年飢散賑

賴全活者數萬千人晚年講學論文開導後起多所成  
就嗜古文詞留意聲律所著有素心集采薇吟疏水草  
俱藏於家又嘗增損顏木隨志今未見也

王之富字仁吾鍾祥人父誥天啟時貢生之富明季以  
武功授定遠將軍與同里張自欽從唐王至閩駐防廈  
門張歿遺孤養託之雖枕戈蹈刃露宿莽飲際未嘗忘  
所託也時有戰艦數十艘多海上人軍中慮其不靖謀  
盡殺之富曉曰人不可妄殺下令留者得數百人悉遣  
散歸 本朝 賜蟒任原職帥師攻銅山銅山故險隘  
陡絕一隅用奇兵繞其後身先士卒力戰克之紀功不  
樂仕進堅懇歸農攜張櫬與其孤養轉江西湖北武昌

荊州康熙十五年 詔賜田鍾祥澧山卽寯其地葬張  
櫬命張子國輔與己子朝輔如昆季晚年持齋禮佛雖  
蠹蝨不忍傷病時遺命已墓必與張冢相望後兩姓子  
孫能繼先志同居共爨無閒言者數十年

彭夢龍字在天鍾祥人幼失父母吳鞠之稍長以力雄  
里開諸惡少爲人害者皆威服之性甚孝每與人鬪雖  
甚怒聞母叱聲輒跪不敢起母歸卽掖母行作孺子戲  
嬉博母歡夢龍市貿資生業甚微而養母甘旨無缺居  
石牌里爲商賈輻輳地倡優所聚風俗侈靡夢龍奮起  
逐之數十年無遺種也鄰人張華死其妻劉矢志守節  
夫族強劫而嫁於潘氏事詳列女篇方劉被劫於潘夢

龍挈劉弟造潘理斥潘族眾以械圍夢龍夢龍奪械踣其眾衛劉徑歸無敢追者乾隆三十九年民飢食及草木夢龍約里中好義者爲粥食之男婦隊別老弱班殊施藥施棺綏營不辭勞瘁雖風雨昏暮不得自休是役也鄉里善舉亦時有行之者惟夢龍精悍善於部署鄉人沾惠加於舊焉夢龍以貿易起家累千金卒以好義傾其所有不自惜也

南鑑榮字物華蘄水人先世皆忠厚相承家計饒裕積穀數萬石樂善好施景泰中知縣鳩立義倉鑑榮首捐五百石上官勸借又出百金成化丙戌春饑出穀一千石例授七品散官知縣屢請爲鄉飲賓

按南氏家譜稱鑑榮捐粟千石

欽賜進士贈承事郎七品散官編查省府縣志皆無賜進士事常由進士與七品階級相同因附會以致誤爾齊有光江陵人力農起家郝穴口東有木橋久毀有光捐二百金易以石石工云術家相傳橋成先走者死有光曰吾修橋以便行人奈何陷人於死工成有光身先四五往反然竟無恙羣疑乃釋

胡世鑑字亮九武昌人親喪廬墓嘗捐金修橋平治道路歲歉出粟賑鄰疫作世鑑施棺濟不能殮者

沈光字字斗垣孝感人少孤倜儻負奇推先業讓兩兄遨游大河南北所至無逆旅時從人借書每得一書必留連詮釋累月不即去十年始歸補諸生第一名既起從者日眾家亦漸饒好周人急數代窶人子婚嫁置義

田贍宗姓建義學延師集族子弟受讀焉鄉有聚訟必  
詣光字取平他人或有言其人輒曰子非沈公何輕主  
是非耶比鄰夜亡其牛忽一人詣光字曰某以貧故竊  
之某氏中道思之何面目見公願因公歸之光字嘉之  
以帛呼牛主還之而終祕其姓字年四十不復進取舍  
後築小閣下俯方塘灌蔬藝藥讀書其中自稱拳閣主  
人卒年六十四卒之前夕先治具招姻好十數輩序飲  
爲別隨出一函曰此某生平行實敢質神明因盥沐肅  
衣冠爲位而拜屬其子會霖朗誦之拜已端坐逝所著  
有大易駢枝錄拳閣詩文四卷

義士

義士阮昇

阮昇字光也生明永樂閒時黃安未建爲黃岡中和里人善居室與妻杜氏俱好善樂施宅前後左右悉置倉實粟封識其上題曰命倉意在備荒且存濟物也杜勤紡績亦嘗私出其餘易豆麥別儲正統五六年歲薦饑遠近數縣民逃散略盡昇設粥食之散者復聚各餉三月糧而儲粟告匱昇憂悶無出杜以積豆數倉繼之大吏上聞疏引民謠朝廷嘉之議授以職昇慨然歎曰凡吾之蓄財振乏非以邀榮力辭不就朝命翰林院陳敬中齎敕褒獎昇每念儉則能蓄蓄則有濟欲作訓以示子孫杜曰無庸訓訓久恐子孫虛詞置之我欲於歲除

祀先母餒舉家食粥垂爲家法庶覩物興思世世子孫無忘儉約也昇曰善迄今除夕阮氏子孫食粥蓋其遺教數百年未替云

義士張鵬羽

張鵬羽黃安人沈毅有略崇正末土寇猖獗居民各保山砦自固多爲賊焚掠鵬羽與其子生員文譽保聚於小金山男女近萬人班分部區畫嚴整賊來則共守賊退則耕粟藏於山有餘則分積山南之小村凡十餘年後有紅袍賊者圍山數重幾半載糧絕食且盡鵬羽令無貴賤日分米一溢誓同死守眾畏服賊久不退值午日賊聚飲稍懈乘夜遣丁壯走間道取魚於塘取米

於倉取羊豕於牢詰朝自山使犒賊示以暇賊愕貽良  
久請撤圍去索鵬羽畜羸日行五百者鵬羽要以毋掠  
村莊乃與之賊折箭諾遂南行所過無犯里人德之文  
譽子希涉能承父志不唯阿捐資濟人至老彌篤文譽  
孫元廩膳生孝友廉介善春秋學者稱之

義僕

哈老漢陽曾氏奴也曾居縣之黃陵爲著姓以愿慙世  
其家哈育於曾勤敏饒心計善權子母佐其主貨殖唯  
謹主中年未有嗣內主妒不能畜妾哈置室沌水之陽  
爲主買良家女主托江湖行估輒宿沌陽別館而哈代  
主行出納千萬金無纖毫欺估業日起主生子數歲內

主猶不知偶攜歸內主見而愛之詢誰氏兒哈始叩頭請死內主爲感動歡迎其母以歸家庭卒無閒言主歿哈七十餘幼主方童哈勤力治喪皓白鬚眉直經伺賓於門不少懈居常遇主行輩於道垂手隅立恭謹不敢少弛少主婚明日偃僂入參新婦自稱曾氏老奴叩頭階下袖金爲贄屏息而出生平衣物食糲不稍自逸主家多賴以起而不自居功哈無子撫兄弟子給衣食而已哈年逾八十出納金貲悉記注爲籍獻之幼主周身外無銖兩自私哈歿主人爲治喪哀戚有加禮哈姓柏字明卿爲人渾穆里人呼爲哈老因以哈名

僧在川廣濟陳氏僕也形短貌頗舉止類恂愁無知乾

隆初年爲陳氏僕已而陳氏中落主翁死主母衰老饔飧弗給幼子嗷嗷不知所養在川朝夕丐於村落以所得養主母并粥哺其幼久之無倦已而主母死幼主未有所托則投身爲寺齋僮傭值贍其幼主已復落髮爲僧夫在川非方外人也其爲僧其幼主故也故不入仙釋而次於義僕

蕭效用本張氏子投漢陽諸生蕭堯竈爲僕娶妻生有子矣堯竈家富仇家誣以殺人仇勢薰灼官不能直竟坐辟效用日夜奔走亟問救於人人或給之曰若肯代主死則主生矣效用欣然若有得倩人書主冤狀始末凡數千言徧刊布之挾利刃徧辭所識不別妻孥值巡

按御史大讞效用闖然入伏堯案旁方鞫訊聞效用忽左手持狀右手握利刃袒胸呼曰天乎殺人者我我主人實無罪有如不信請刎頸以明不欺卽揮刃自戕剗然有聲血濺數尺御史大驚檄所司平反爲好語俾昇以歸創臥三日而氣未絕惟兩手拍繫不可忍守者哀之祝曰願君速死速死君死且不朽矣乃指畫七字蓋堯案行次七也守者復慰之曰賴君此死御史且貸七郎效用遂瞑目逝效用之死自撫按憲司皆爲驚歎下至伍伯阜隸之流無不唏噓泣下堯案由是得免而姦豪亦短氣矣

金祥武昌熊桴門卒也桴已有傳桴始官太倉奉詔討

倭祥十餘人從偶戰敗皆散去獨祥不去桴曰我死國分也爾何爲乎公死國小人死公亦分也竟殿桴後桴過橋寇亦登橋祥奮死下橋摧之橋壞寇墮水死者六人桴得免已而屢捷進桴同知討賊如故一日從桴會酌郊外祥望見忿氣大叫寇至眾驚譁騎從皆失有馳馬過者祥推墮之奪馬乘桴親執其銜馳躍如雲望之人馬足皆不在地抵城祥嘔血數升他馳者多迷道遇寇死桴常戰敗祥翼桴奮擊得大捷桴在海上大小三十餘戰祥未嘗不從屢脫於險皆藉其忠勇云

藝術

李時字德春自江西徙居漢川家世受醫精脈法冥思

聞解多出授受之外性沈默入門無流視無媒言未嘗預問病者察視脈理形神如往久之指離於腕徐以一語發病者隱結投藥而病愈鍾惺數構奇疾法當死蔣數起之人呼爲李仙翁

傅之鉉字木希江夏人其先四川長壽業舉子以攻苦過得咯血疾乃旁通於醫會國變乃醫隱江夏精太素脈理決死生休咎如桴鼓應學使李可沂試使二女子年相若者各一手隔幃診之鉉曰此兩人也巡撫丁某使診曰君相二氣交和將坐遷總督矣其診理卿李昌祚曰秋得春脈弦且長草青當痛左脇而終旣而果然診巡撫張某出謂人曰脈大粗且急他時旦乎布政劉

某以事坐辟之鉉曰得輸鬼薪當無恐皆奇驗所著有  
四診纂要諸書藏於家

陳德潤字廣譽江夏人幼遇異人授醫術尤工幼科全  
活無數前總督郭琇六十始舉子三齡患便瘤諸藥不  
效潤曰此蟲也發於陽明下小蟲數百立愈布政王燕  
少子患痘氣已絕潤察其色曰是可治火攻之繼以藥  
餌授期奏效年八十五卒

黃道瀉字又朴本楊姓江夏人以醫著內經本章默誦  
無遺視某病至堂問咳聲曰不可治也即謝去果卒總  
督邁柱妻病診之決以日時留署驗之信然診柱脈曰  
公脈洪大冲和行當大拜果未幾入閣

朱盛洙字蓼庵江夏人故明楚宗室克信子克信有學  
行盛洙有父風癸未獻逆之變盡驅楚宗入江盛洙浮  
三十里至鮑莊有汲僧救之避逃梁子山易名謝世仁  
字忍生隱於醫聲甚著工詩通丹經壽近九十子容棟  
字二安亦以醫著當道欲薦入太醫院不就著醫宗尺  
玉琴操諧譜梁湖草壽亦近九十

朱雲燦號尋源明遼藩裔家江陵善山水師同里郭士  
瓊用筆爽邁勁健好作小卷又善畫馬古來畫馬尙勾  
勒次渲染尋源以逸筆灑墨頃刻成十數匹而神駿之  
姿谷具尤工畫魚亦以逸筆灑墨稀微隱現氣韻生動  
平生好游凡名山必圖之於泰山作全圖一分圖十六

並梓行之於黃山每境作一圖凡四十八於西湖作長  
卷起雲林終昭慶後以意綴天台石梁錢塘江湖以寄  
其興所著有畫鏡一卷從兄雲輝字天霞號曙園善花  
鳥山水名聞荆楚性傲岸不合時老於布衣又劉塞翁  
潛江人工翎毛尋源稱其筆有生氣

安嘉材字篤齋江夏歲貢通醫能決人生死或假病狀  
臥呼安診之曰公無病戲耳有匠人微疾安診之曰命  
在旦夕眾不信其人果心痛卒某病危購木以待安診  
之曰此病將愈爲下藥餌立效

補藝術傳

閔德裕字瑞玉廣濟人父應會自南昌遷家於縣之武

穴數月而應會夫婦相繼亡德裕生纔數月始遷家無親屬可依應會有死友三人沈君意周之美程在謀相與鞠育教養程妻以女授產千金德裕長成無他嗜好精形家言嘗徧歷山川原隰左右高下或平坐側臥移日忘返人以爲樵采者流而不知其脈管水土洞達微隱歸輒圖其形勢筆以爲書著堪輿一貫釋義四十卷爲世所推然未嘗應人之招默識而已將卒前數日不言而若有所測比卒手書屬家人曰余死必以某月日葬余於某鄉之原首趾某向毋違余言家人如命治葬啟穴見水眾請改卜家人篤信不違竟葬穴中明日視之泉氣漸遠期年而成高阜地師莫能測也有子曰貞

貞字正齋德裕夫婦之卒貞年始十二居常惻惻思父母欲圖容貌奉之於是力學繪畫藝成爲人傳形無不肖者久之欲圖父母閉關精思下筆輒失其意累絹素十百終不得其彷彿投筆恨絕輟業游行達市間冀遇得似其親者久之見田叟於途神肖其父貞驚喜揖致其家納叟於座跪進飲食叟大駭異貞與周旋其閒陰追父象比送叟出反次舉筆而父象以成又數年有媪衣縵縷乞食於門貞諦視之神似其母亦追摹如前於是合圖父母懸之中堂見者以爲如生貞又繪奉饌圖坐父母於上而已進饌具妻妾及其二子捧壺觴佐饋其旁朝夕薦食如平生祝曰世世子孫長如吾父母在

也貞游藝都門王公貴顯爭寶其畫尤重其爲人稱之  
爲閔孝子

改正藝術吳偉傳

吳偉字次翁江夏人少孤家貧習於繪事不師而能山水人物俱臻神妙負氣岸與俗寡諾求者非其人不應成化閒成國公延至幕下賞其俊逸呼爲小仙偉因以自號憲宗召授錦衣鎮撫待詔仁智殿有時大醉被召蓬首垢面曳破履踉蹌行中官扶掖見帝帝大笑命作松風圖偉跪翻墨汁信手塗抹風雲慘淡生屏障閒左右動色上歎曰仙筆也偉出入掖庭權貴求畫多不與權貴數短之放歸南都偉好劇飲或經旬不飯每飲酣

落筆輒似有神助其在南都諸豪客日招偉飲飲非妓不歡諸豪貴欲得偉畫者皆餌妓求之孝宗登極復召見便殿命畫稱旨授錦衣衛百戶賜畫狀元印寵賚日厚偉乞歸祭埽數月有詔趣回賜第西街逾二年稱疾得居秦淮正德三年武宗遣使召之未就道中酒死年五十

列女

節婦

胡氏荆門胡永臣女適同里楊堪逾年夫歿慟不欲生庭前有李一株無故而枯胡曰李生吾乃生耳數日枯根發芽胡撫遺孤未幾舅姑棄世孤亦尋天胡形影相

弔備極艱辛事闔旌表

荆門大佛庵二尼長法淨故連州參將武君仕妻次法巖故荆門營千戶張世宰妻也夫死行陣不欲以節名隱姓寄跡空門世罕有知其志者今原其志不入仙釋而次於節婦之篇

譚氏京山向學孜妻夫卒譚年二十有四姑歿停柩中堂鄰火乍起譚驅子出避身伏棺號呼前後皆焚惟中堂無恙舅游衡嶽攜譚長子過洞庭墮水死舅每感傷譚必多方慰藉人皆稱其賢孝乾隆四年 旌表

劉氏黃安農民張啟席妻年二十適張事舅姑甚謹水漲夫築壩失足溺水不得其尸劉躍身入水羣救之得

免而尸浮出其處觀者詫之劉復欲赴水或以舅姑孤  
子諭之劉由是上事下育交盡其責乾隆己酉卒年六  
十有九

盧氏京山田煥妻煥卒年十九家貧紡織以奉舅姑舅  
亡姑病痿盧衣不解帶者屢月夜大風火起延及姑室  
盧跪火中顛天頭額皆焦天忽反風滅火姑房晏然乾  
隆乙未 旌表

楊氏黃安張之孚妻之孚故貧訓蒙餬口楊歸勸夫力  
學夫苦無資楊力任機杼之孚由是辭謝蒙童游學於  
外楊屏當家務供其束脩無何之孚苦讀致疾自知不  
起謂楊善事後人毋誤青年楊泣曰余振君遺體矣君

必有後無他言也夫卒果生男楊命就傅晝促之學舍  
晚歸篝燈與共子亦力學以承母志無何楊疾遽卒語  
其子曰兒長矣讀書無負我使我不負若父也

鍾氏黃安舉人其鐸女年十七適同縣王明璐佐讀甚  
勤一室篝燈夫讀婦績夜分不止明璐能文巡撫觀風  
試第一未補諸生疾不起鍾年方十九父母憐其少欲  
使時時歸寧鍾辭曰薄命之身婦兼子職不得復顧恩  
私由是事舅姑加謹伯妯每事與借則曰伯氏服勞於  
外妯肩其半可也我痛亡者未盡子職思以未亡之身  
兼之自宜勞倍於妯所以慰亡者於九原聞者咸爲太  
息課子應時力學補諸生家故溫飽樂義好施常無宿

糧歲飢家人及僮僕食指數百食不繼至啜糜食芻應時泣曰兒累母矣鍾曰此何足苦子孫世世無忘啜菽幸矣

朱氏鍾祥張源妻生數歲父母俱亡幼穉待年於張以端慧見愛於舅姑或問思父母否對曰非不憶父母舅姑愛我不減父母如言念父母人且疑舅姑遇我薄也舅姑愈益愛之朱不恃愛而惰年纔十歲餘一切紡績井臼操勤倍於其妣年十七與源成禮源以家貧訓蒙爲業伯兄淮貿易小市舅姑年邁朱請獨任孝養以源脩脯所入身勤紡績力經營之甘旨靡缺而產亦少增人稱其能源天朱年方二十五無子欲請嗣伯氏伯氏

僅一子則出其儲蓄爲伯氏買妾至再乃得生子以爲之後伯氏長子復夭朱授嗣子產而命之歸宗俟得孫而後焉

夏氏天門譚寶世妻寶世卒夏年甫二十四無子以從子澤邠爲之後夏通文史家貧無以資生遂設女塾課徒自給邠自少長未就外傳經書文藝皆出夏內訓也邠娶同縣舉人謝名揚孫女頗嫻內則于歸後恪盡孝養夏卒邠補諸生旋卒謝繼姑志誓守窆地未卜兩柩暫殯於家比鄰火起延及殯室謝哀泣呼天兩柩爲頽壁所蓋居然無恙生員澤醅次子蔚言承祀

漢川二婦一陳氏女失其夫姓名夫出經商襄陽數年

一歸婦子身所庇茅屋兩椽門常晝掩鄰依母家婦晝往依母夜歸茅屋鄰里罕識其面有無賴子密伺婦歸暗中投錢婦擲錢怒詈其人遁去後得風疾炊飯墮釜中死一洪氏婦失其母族洪氏業農婦美容色惡少黠之伺其夫出走匿婦牀下伺婦熟眠突出手掩其口婦力脫之聲警四鄰惡少遁去婦生平堅忍能貧家無宿糧見人恥言有無

伍氏咸寧劉應瑞妻江南人也從父母僑居江夏劉亦隨父居江夏謀生因爲昏而劉貧不能家應瑞贅於伍門未市月應瑞疾卒父母以其無子早寡欲殺其服伍厲色不可服除女弟陰說父母爲謀再適伍以死誓然

劉父貧甚伍不能歸居母家抑鬱感疾疾革劉父視之  
伍強起再拜曰翁勉自愛新婦不幸短命不能代若子  
終事翁罪也生不能居劉氏室死後願埋劉氏一坏土  
於願足矣若子宜有後婦有少隨貲請留遺當後者俾  
識父母翁老矣強自寬毋爲兒女戚戚新婦死不朽矣  
言訖而逝年甫二十有四原其志錄之

漆氏江夏譚正鑑妻陳氏正鑑妾也漆以已多病懇懇  
納陳陳歸僅數月而正鑑卒陳已有遺腹已而舉子嫡  
妾協志矢節撫孤方正鑑卒漆年二十七云乾隆十一  
年旌

王氏江夏艾紹泮妻歸泮甚貧窘佐夫攻苦勤織紵資

膏火孝事祖姑夫弟九歲失怙恃厚字之夫病療臥牀第數年王盡瘁治療夫卒王年二十九祖姑八十九矣王服事寢食不離夫弟痿痺二十餘年共其娣拮据撫二從子以其次爲夫後乾隆十七年旌

錢氏江夏熊湖妻姑疴羸有疾錢謹奉事飲食必如所欲年十九湖卒泣傷左目數月子殤撫夫幼弟不以累姑偶嬰疾或勸召醫謝曰未亡人數十年雖兄弟至戚未親授受豈可使人診耶且未亡人固以死爲得也晚以從子嗣乾隆三十四年旌

潘氏江夏吏員熊正道妻夫歿無子欲殉者再母以死要之乃止僕逃議者請醮所妻婢潘不可逾年僕果歸

叔氏爭產請以子嗣悉棄之攜所生女他棲鍵關紡績以縷易米終歲晏然康熙五十八年 旌

王氏江夏洪應召妻年十六歸洪甫兩月洪嬰疾王延醫力拯之洪卒王甫二十歲引刀截耳以明無他局室紡績苦霖積雪麻縷弗售則閒日一食值舅姑與夫忌辰必豫克旬日糧具祭奠必盡誠禮父母歿不能窆典鬻葬之乾隆十二年 旌

何氏江夏程之寧妻年二十四夫歿舅姑衰老家無擔石儲何勤紡績曲盡孝養撫遺孤于天成立家漸豐及孫輝唐耀唐益充裕曾元多列仕版五世同居家敦孝義先後推施濟物捐銀捐產約萬餘金與何節行前後

同旌

郭氏江夏傅某妻年二十七夫亡子明相甫三齡紡績  
膳姑撫孤成立明相性孝貿易湖南會母疾忽心悸疾  
馳歸籲天請代母輒愈人稱孝感督學旌之

趙氏江夏劉必槐妻幼訂婚因俄必槐自媼肩墜地傷  
膊露骨長成籬條兩家父母議改盟趙誓死相從謹事  
無怨必槐卒趙年二十七孝事舅姑撫夫弟必林子爲  
嗣卒年四十九

池氏江夏劉朝一妻夫死貧無立錐強行乞必十里外  
晨出夜歸近家則藏乞具

潘氏江夏鮑公新妻年二十五舅與夫繼逝初繼姑生

叔氏與己子同月姑歿潘均乳之長成教育無歧視卒年八十五知縣表式其閭子之槐爲國學生早卒妻張二十五歲撫孤上冒矢繩潘志士冑次子有烈聘朱氏有烈年十一得廢疾不可昏兩家父母欲改盟朱誓死歸之曲意順承若將終身歷十二年有烈卒朱年四十四疽發於臂卒

吳氏江夏趙錚妻許聘未昏而錚有痼疾父母難其歸吳誓死不易遂歸趙趙得吳善事而疾漸瘥生子光浩四歲而錚疾復劇卒不起吳勤儉撫孤益起其家

胡氏江夏傅世傑妻十九而寡明年遺孤復殤孝事舅姑撫從子映元爲後映元年十八天聘程聯彬女年二

十聞訃慟絕卽欲歸傅守貞母兄止之遂偕媼竊往母兄追止於途搶地誓死乃歸傅守貞

余氏馬氏俱江夏宮國柱妾也國柱卒余年二十僅一女馬年十九無所出嫡張生子亮齡甫一歲張旋歿二妾恩勤教育倍於所生亮齡長成娶婦夫妻事二人亦如胞裏焉馬終年六十一余終年七十有二

王氏江夏萬汝霖妻年十九夫卒兩投繯遇救不得死閱兩月生遺腹子樹人遂矢志撫孤姑患癱吮之而愈樹人補諸生以王節請旌

萬氏江夏諸生萬邦孚女年十八適同縣田道柱一年而寡立族子大煥爲嗣矢志守節舅與夫二柩未葬有

田數畝爲夫從兄所侵欲奪萬志萬剪髮斷指堅不可奪學使洪樸嘉獎之姑王病痢三載萬侍湯藥不倦姑歿三柩一堂煢煢相倚楮柱三十餘年始得營葬

梁氏江夏陳元勳妻年二十歸陳舅國棟由艱難起家元勳又多疾家事皆委於梁及生孫兆觀國棟淡於營利漸喜推解元勳歿梁矢志守節仰事俯育恩義周至戚族有急輒脫簪珥助之兆觀長能讀書補諸生左右就養善體母志

黃氏江夏歐陽國珍妻年十九于歸二十一守節教子成人諸艱備歷乾隆戊寅鄰家火起延及其家從子急奔樓請黃避火黃以簣夜倉猝男婦無辨堅誓不行質

明視之前後左右俱燬獨黃所居樓無恙乾隆二十五年 旌

陳琬字玉清京山李慕召妻幼穎異嫻女則及笄適李乾隆丁亥李卒琬甫二十有四矢志同穴舅姑憐其年少無子而家又貧恐其難也而未忍言琬日啖藜藿奉舅姑甘旨無缺意自若也會歲大疫姑病不起舅亦繼殞琬侍疾送終以殯以葬無稍違禮撫從子嗣訓課不假姑息其子漸長力學能文琬勤儉自持家亦漸裕又能分潤族戚全者甚多

舒氏漢陽汪錦文妾同縣光卿女也年十八歸汪未三年汪病舒侍湯藥甚勤及病篤舒禱天願以身代汪歿

哀毀水漿不入口者數日嫡婦力勸勉之舒年甫二十  
一矢志堅守事嫡婦恭敬盡禮嫡婦愛之未幾嫡婦亦  
逝舒經營喪葬請於宗族長立嗣子聞謂舒保護教育  
倍極勤勞卒有成立乾隆十年旌五十一年卒年九  
十有四

朱氏漢陽舉人朱晉秩女年十八歸同縣陳光祀光祀  
依親宦游客死於外朱年二十有八無子而舅候選學  
正均年已六十朱求死不可得及繼姑舉子光政朱乃  
進慰舅曰婦請爲其難矣爲姑撫育叔氏早夜焚香告  
天乞延宗祀光政受室舅姑繼卒又五年光政生子乃  
爲朱後年六十五卒

顧氏襄陽劉仁妻十九歸仁二十四歲仁卒祖姑孫氏  
姑羅氏皆孀居孤子生僅六月顧誓志不易家貧身無  
完衣日勤紡績上奉兩姑下育孤兒祖姑與姑繼歿竭  
力喪殯莫不如禮初乾隆己未鄰家火起延及其門顧  
力扶祖姑及姑出託孤於人復入撫夫棺不去意與俱  
焚已而遇圍俱燼惟顧室獨存人皆稱異乾隆丙戌

旌

吳氏穀城余邦璐妻生十八年適余又十年而夫卒孤  
子方幼穉矢志堅守夫卒貧無以殮鬻衣治殯躬負土  
築墳莫不流涕有強暴豔之乘閒欲相犯吳持利刃自  
截其指血淋漓以示之強暴駭奔自是無敢以非禮見

者所居敝屋不禦風雨康熙丁酉猛虎搏人鄰居多被害獨吳居無恙人謂有神衛焉勤於操作紡績五夜不懈樽節所餘爲子擇師其後家稍寬裕而儉約如常其奉舅姑則備極孝養舅姑旣沒喪葬大事必慎必誠

曹氏江夏寄籍監生章志興母浙江會稽曹俊平女也志興父世鷺自會稽遷蔚州與曹舊姻姪曹仕廣東游擊世鷺與兄世鵬相從官署因以女歸世鷺雍正壬子世鷺卒曹年甫二十四長子志興五歲次子志發生始一周曹撫孤矢志禮法交盡世鵬官湖北游擊迎曹及二子至官舍與伯姒相得無閒言前後十八年如一日也世鵬歷官至襄陽總兵罷官不復能歸因寄籍湖北

曹卒乾隆辛巳年五十三矣世鸞以例授通判曹應封安人云

徐氏應城生員呂焯喆妻天門故太平知縣尊顯女孫也徐出世族幼嫻禮教年十七歸焯喆焯喆兄弟三人皆號素封而焯喆溫文嗜學尤爲都士大夫推許徐門內相莊甚有禮法姑魏性嚴子婦起居朝夕鮮能當意獨宜焯喆夫婦相依以居終年九十餘徐承歡扶掖若左右手焉焯喆久無子徐勸置妾不可乃鬻隘從母家相妾妾甫入門而焯喆遽疾以卒時乾隆辛巳徐年二十有九一女生甫數歲耳撫夫兄子徽仁爲後呂氏兄弟爲宵人構煽遭家多故至涉訟庭連年未已家亦中

落徐以少孀撫教子女委曲周旋其閒備嘗艱苦卒能  
曲全慈孝不墜先人家聲里黨稱之

安氏應城呂之僖妻雲夢貢生圖奉女也幼事繼母以  
孝聞年十八適呂事舅姑婉順得其歡心之僖業儒勤  
於夜讀安輒以組紉相伴率至雞鳴之僖疾劇安脫簪  
珥求醫藥籲天請以身代卒不起安年甫二十有二矢  
志撫孤率勤無怠其母家頗裕招使家居就養豐腆安  
辭曰女子有家義不反處且姑老必親奉侍於心始安  
又呂氏諸昆季勤於誦讀吾子幼使習而安焉挾冊以  
隨羣從姑心亦藉慰矣由是足跡不及外日勤女紅傭  
工治稼奉姑課子終歲不倦姑見其勞悴嘗泣慰之安

從容慰姑曰姑老矣猶以婦爲念是婦未爲孤苦也惟姑精神強固承歡膝下正婦樂生之年願姑勿爲念矣及姑喪哀禮交盡子庭樂業儒能文今守節三十八年萬一姑江夏田道澍妻 旌表五世一堂萬廷模女孫也年十九而寡苦節三十餘年

劉氏鍾祥張華妻華卒其弟某利其貲誘劉歸寧強嫁于荆門潘某劉截髮髻面潘不敢犯其鄰人彭夢龍與劉之弟護之婦以節終

駱氏江夏萬華祖妻年十九歸萬甫一月華祖病駱刲股和藥卒不起駱誓志自守踰年舅姑相繼亡家貧喪具多貨於親戚駱日夜勤女工銖積黍累以償夙逋有

憐其苦節卻不受者則曰矢節婦職宜爾非所以受憐也且舅姑亡夫義慊於九原吾之所獲多矣聞者敬服而不能卻駱撫嗣子殤今生五十五年寄居於母弟胡氏黃陂張必爵妻適張生子方耀甫十月而必爵逝胡年二十有七矢志撫孤以勤儉持其門戶嫁二女昏一子數十年搢柱歲月未嘗藉人助也長孫廷幹娶同縣柳氏生子成已甫周而廷幹亡柳年二十有四能繼胡志紡績課子柳通書史每子從塾歸則課所受於師遂成其學乾隆乙巳大禮族戚多飢餓柳質田以惠貧者時柳亦拮据非裕於財鄉人以是稱之

姚氏天門貢生鄒穀妾也幼能詩父使以詩擇壻遂適

鄒常喜誦鄒詩二年鄒卒守節更不作詩依嫡子昌言  
昌言官知縣姚從官舍歲時起居昌言拜於堂下姚端  
受不令止或以爲言姚曰父有愛妾子沒身敬之禮也  
會嫡孫法孔失母姚撫長之每舉穀詩口授一字無遺  
壽八十終

朱氏天門生員胡之驊妻之驊隨父川南道恆守雅州  
逆獻之亂父子殊戰死事詳忠義傳凶問至恆妻妾子  
婦皆引刃自裁朱將從之姑樊以三月幼孫峨生屬朱  
存後曰一脈之寄願汝勉任其難朱泣頷以出外親陳  
君美左右之倉皇匿民間轉徙榮經縣降賊武大定在  
嘉州聞朱殊色劫致之朱莠面毀容堅不可奪又爲某

貴人所偏朱乘閒負峨生上書南安平西兩王始得全  
會歲饑斗粟十金朱紉髮取直得食以食其孤忍餓瀕  
死恆幕客汪光翰故人鍾之綬相資以生母子乃克存  
活流離辛苦二十餘年峨生讀書能文補榮經諸生蜀  
平道通朱氏乃引峨生歸於景陵

李氏竹山縣武舉張廷儒妾也生長揚州知書通大義  
未字而父母兄弟俱喪貧無所依適廷儒官徐州衛領  
運千總約爲小妻事廷儒母郭及大婦王能孝以順廷  
儒又納妾郝氏李友愛之當廷儒出運母妻相繼亡李  
書告廷儒請留郝官署而身奉君姑與嫡柩歸葬祖塋  
無稍愆禮郝氏生子李慈撫之門以內廷儒甚倚賴焉

乾隆丙午夏廷儒失事遣戍潼關疾卒臨汾旅舍李年甫二十餘家貧無恃門無次丁李俾郝居守身跋涉奔喪變產不足攜廷儒十齡從子一從老僕走徐州謁同官告助猶不足則彳亍步行至臨汾收骨置櫬欲背負歸會知縣聞其事深嘉歎之助以資斧與馬得達襄陽舟溯漢流抵家以禮安葬前後八年登涉水陸往返不啻萬里經涉南北至六七省會部署行李窮困支屈喪葬禮節皆以娟然一少婦咄嗟辦之人以是稱其賢能李旣以賢能主持家政郝亦傾意下之其撫遺孤其孤若不知誰所出也然張族習尙多歧李與郝謀攜其子別居僦舍俾就書塾人問何爲自苦乃爾李曰孺子須

慎蒙養吾恐如素之緇於染爾

朱氏黃岡張其源妻年二十適張生子廷植甫三歲而張卒朱矢志守節勤儉操作舅聯奎乾隆癸巳恩貢憫朱苦節諸子分炊別構新宅居朱鄰婦有忌之者陰以婦人下衣冒其梁朱覺之請舅更梁木舅詢故朱權詞對曰夜夢先祖謂梁不吉舅爲易之終其身不洩也子廷植讀書善文能繼家聲

鄒氏麻城程九萬妻歸程三載九萬讀書攻苦得疾且革鄒禱請身代卒不起時鄒年甚少卽矢志堅守孝事舅姑疾病喪葬無不盡禮撫孤子宗洛思不妨義鄒母老不忍遠離擇居里許便旦夕起居時致甘旨遷居之

日適有孤燕飛止其舍迴翔不去集於幃幕旦夕哀鳴  
鄰以白絨繫其足自是每歲必來人以方衛媛之貞

烈女

明樟樹女不知姓氏崇正八年秋廣濟遭虜掠賊游騎  
見女美欲污之不從懼以刃女手抱樟樹不釋罵賊遭  
屠崇祀節烈祠

蕭大姑江夏蕭彩玉女許字漢陽唐敬傳唐家貧遠游  
年將三十未昏大姑母老弟穉紡績自給若將終身俄  
敬傳客死訃至大姑誓以身殉母弟防守之乘懈登樓  
自裁乾隆十二年 旌

烈婦

明江氏廣濟許惟高妻崇正十六年叛卒將從張獻忠道逢江氏豔之強污不從使搗婦諭之曰我輩亦良家不得已爲偷生計江嘗曰若等後吾死耳賊怒斷其指復截其耳江益詈之賊怒剖背而抉其心聞者莫不垂涕崇祀節烈祠

明江氏廣濟李萬里妻崇正八年後江隨夫避萬絲嶺見賊勢盛泣語夫曰勢不兩全君無戀我我死君再娶生子得絲似續是我死而不死也萬里猶豫不忍遂觸樹死以絕其心亂定萬里續娶邢氏卒延世祀

梅氏江夏羅國棟妻棟貧不支欲梅賣姦給食梅投繯死康熙四十九年旌表

張氏湘潭諸生張之灝女之灝贅江夏王氏因寄籍江夏張歸施繩才二載貧甚憇夫赴河南官戚館張績紡奉姑甘旨自嚙糠粃時與繩郵詩交慰乾隆辛卯繩客死僕扶櫬歸張迎哭曰夫死異土妾致之也請相從地下遂觸棺死

蔣氏天門生員郭昌妻康熙己卯昌病知不可起屬兄爲棺蔣令匠大其棺昌治衣衾蔣令縫人更製己衣如其襲而色亦稱之昌散藏書於兄子蔣亦散其簪珥於眾姒姪家人知其必以死殉而莫可如何旣而昌卒蔣投閒自縊密紉周身衣履綴合爲一郭住乾灘爲大市鎮是日弔者爲之空市

汪氏漢陽熊嶠妻吏部郎某孫女也嶠力學能文家貧  
藜藿不充二親早喪汪紡績助讀勤而不倦會應學使  
試使雋其文以小疵遺名及學使召見知爲伯龍之裔  
苦寒藍縷深惋惜之歸而咯血旋卒時天大雪汪泣不  
慘悲不戚閉關一室日紡木棉足易菽食卽止母家餽  
薪米拒不受從俗數七七期滿髮莫夫靈紉周身內外  
衣聯絡爲一歸省母氏其夜自經家人爲盥櫛治殮於  
髮內得書云我名家女死卽瘞埋毋驚鄰里以全我志  
乾隆九年事也

況氏應山農家女黃陂葉子榕妻也子榕家貧爲贅甥  
於況夫婦相敬如賓丙夜紡績子榕讀書相對歷寒暑

不倦期年生子又一年子榕歸黃陂省親月餘得疾遽卒訃至況匍匐奔喪撫尸慟絕欲以身殉舅姑諭以撫孤因勉自活夫家貧甚停柩未能就窆况仍歸依父母以居設爲夫位朝夕抱孤兒祝曰天乎其知我心自是不櫛不膏操作益勤紡績常至達旦積錢得若干貫攜奉舅姑請葬其夫無何其子病殤况以頭觸石血流被面父母兄嫂環泣力阻不得死因絕粒水漿不入口凡五日舅姑踉蹌來勸况時已憊強起拂衣理髮令人扶向舅姑再拜辭謝並辭父母曰兩家承奉甘旨幸各有入未亡人乞身得從良人地下足矣時氣息僅屬而神志從容越兩日餒蟲出口鼻閉累累盤旋牀褥見者皆

泣況怡然似無患苦已而告其母曰兒服未闕當以衰  
麻殮殮卽投土毋爲父母憂索水自嗽手梳櫛髮理畢  
遂逝年二十五時康熙庚子也

鄔氏漢陽蔡店民家婦也順治乙酉李自成敗走自北  
而南蔓延江漢間殺掠無遺鄔與其夫皆見擄鄔有色  
恐不免蓬頭垢面臭穢塗體左右其夫得閒與夫俱逸  
抵江夏之長山村村虛無人跡棲破屋中苟活者數月  
無何夫病鄔朝夕不敢怠出所藏簪珥走山中易糠稊  
爲粥以進已而夫竟死死三日鄔始遇一村農乃泣請  
曰男子不幸道斃棺不可得乞購一板藉於溝壑死不  
忘因出雙環履底且拜且泣村農感泣爲市一門板舉

尸就山谿殞焉甫畚土卽急投身抱夫骸呼曰乞并埋我村農驚駭釋鋤力勸卹無一語乃走告鄉中翌日鄉人爭至就壑中扶令起卒不顧以死鄉人皆感動爲大其冢遂相與誦其節不衰後十餘年漢陽蕭企昭爲表石其墓

梅蘭如江夏女子性警慧幼聞塾師課弟輒通書旨長有令姿侍母周能孝年十九家貧爲媒者所給贅壻匪人屢欲攜投豪門蘭如不可欲鬻使乳豪家兒又不可匪恚甚欲攜蘭如別居蘭如察其無良弗肯從匪故出外居數月誣周逐壻將改醮女訟於官官弗察判婦從夫蘭如遂毀容遠嫌以禮自持匪忽引姦僧入室蘭如

號鄰舍鳴官杖僧逐之匪益怒撻楚窘辱至不可堪蘭如順受不爲改易匪又遷木工家集惡少酣飲謔浪夜半木工入擁蘭如蘭如大呼鄰里明日鳴於官官未卽理匪或捶撻挫折之蘭如忽理妝若將迎新匪徒陰喜翼旦啟戶則蘭如懸身梁閒死矣衣履上下俱密聯紉解視神色如生於是閭里咸爲感動相與鳴官官又未究其實事且寢明年巡撫陳世倌莅任母周泣訴於轅陳詰有司有司以事隔經年發且坐稽延律而姦人賄惡少詣官自陳素通蘭如有司藉以自文陳察其誣遂抵姦於法而蘭如得旌時久旱獄定大雨滂沱人心稱快此事見王元士文集世多有之前江夏縣治獄幾

誣其節今江夏人修縣志亦無其名乃知幽貞之不幸而不得傳者多矣

周氏隨州陳立方妻比鄰有惡少年豔周色托交立方周窺其意屬立方遠之立方不悟乾隆乙巳夏周與立方異寢夜半惡少冒立方就周榻周驚覺詰之不語俄聞酒臭而立方素絕飲周覺其姦大呼賊遁已知爲比鄰惡少周哭懟立方曰吾勸君遠之今何如也卽擲兒付立方欲自索死立方解之曰幸未辱也周曰辱則死亦不足贖矣紿立方出竟自經死七日面如生

謝氏麻城成天漢妻黃岡世族女也歸成十年生二子一女居室相莊人無閒言乾隆戊辰以媿身得疾三年

轉劇鄰婦有得疾與謝同者其後發狂至裸體入市謝聞大恐謂婦人辱及體膚義不如死人至發狂不自持矣宜及其未然先死以免辱也遂自結束投池水死

才烈

韓希孟襄陽賈氏婦也賈故仕宋爲尙書開慶元年元兵圍岳鄂希孟被俘年始十八不肖屈節裂練裳書詩見志乘閒投水死三日屍浮出得其詩於衣帶云宋未有天下堅貞臣節秉興周百戰功臨陣惟服整逮事周幼主臣心常炯炯陳橋忽兵變不得守箕穎禪讓唐虞公守文禮樂炳儒崇士節勵政寬刑罰省有國三百年忠厚傳規梗如何遘陽九皇天肆大眚古今治亂閒真

有幸不幸失人焉得人垂首昔炳炳江南無謝安塞北  
有王猛戎馬橫江來飛渡蹙國境東南海天寬不容一  
舴艋益州失西固風鶴驅鄂鄂烈火燎崑岡不辦金玉  
礦妾本良家子詩禮守貞靜嫁與尚書兒門第貴臺省  
雞鳴相警勉容止戒端靚初結合歡帶誓比日月兩鴛  
鴦曾雙飛比目願常並豈期葳蕤姿猝邁桑榆景浩劫  
變陰陽死生決俄頃退鷓落迅風孤鸞弔空影簪抽折  
白玉瓶墜斷青綆妾志水不波改邑不改井妾心明不  
昧孤星曉耿耿不作燭火燃願爲死灰冷貪生念麴蛾  
乞憐羞虎穿滔滔長江水歸我全首領闔闔帝庭開雲  
霞燦光景毅魄達九閻叩階血面請願化爲精衛填海

誓成嶺又詩曰我質本瑚璉宗廟供蘋蘩一朝嬰禍難  
失身戎馬閒寧當血刃死不作衽席完漢上有王猛江  
南無謝安長號赴洪流激烈摧心肝按宋史烈女傳載  
後一詩不載前長篇史文宜有裁節無足爲異惟史止  
云韓氏女字希孟巴陵人或云丞相琦之裔不言夫姓  
觀詩言宗廟供蘋蘩與長篇詩云嫁與尙書兒其言相  
合是有夫家明矣按陶宗儀輟耕錄韓乃魏公五世孫  
賈尙書子瓊婦而襄陽府志引舊志云賈尙書瓊子婦  
以爲實指官階姓名似非無稽但以瓊爲賈尙書名則  
襄陽志誤也至廖元度云元兵圍岳鄂不指襄陽而志  
云韓巴陵人襄陽被兵避歸岳州元兵破岳韓被俘盡

節則在岳非在鄂矣韓巴陵人而殉節於岳不繫夫族無由入湖北志也襄陽志文辨之當矣而志又云長興州判官沈思安屬劉元禮者丐趙孟頫爲書其詩諾而未果夕夢一婦人趣元禮求書孟頫聞而異之因書以歸沈廖元度亦云韓沒後三十年見夢求趙書詩此或文人附會不足傳信韓之志節自足不朽亦不以能得趙書爲輕重也

盧氏荆門人宋統制吳源妻源救襄陽陣歿盧聞訃大慟部署家事畢作絕命詞云夫爲甚宏血妾感共姜詩夫妻同死義天地爲淒其遂自縊

霍玉真漢陽名家女順治甲午兵亂被俘不屈投江死

尸順江流至京口漁者出之水面目如生背縛白綾書  
九絕句其警句云青鸞有意隨王母空自人間設網羅  
又云濤聲夜夜悲何極猶記挑燈讀楚辭又云河伯有  
心憐薄命東流直到洞庭西又云簪纓雖媿奇男子猶  
勝王朝共事臣又云朱門空說諧秦晉死後相逢總不  
知又云寄與雙親休戀戀入江猶是女兒身詳其詞意  
蓋許字於人而未嫁者也第首句云家鄉一別已經春  
此日含羞到漢濱又是似非漢陽人而李以篤文集又  
稱爲漢陽人別本作湘中女而無姓氏恐各自一人今  
並存以俟攷

俠烈

金香蘄州顧博妾也香爲元左丞金某之裔明初以罪配樂籍隸荆府香尤姿豔能爲新聲博暱之輸資於府請爲小妻行有日矣而庶宗某者最桀驁慕香欲強劫之值香方沐眾突入香左手握髮右手持刀從容出戶外誓曰妾不幸以先人故世隸王籍身不得自主命也今王許委身願君有名義矣如以非禮辱我我必殺之亦自殺也挺刃欲前眾爲潰沮香竟歸博博家世儒業博任俠善騎射明正德六年有流賊過蘄博率鄉勇捍之設伏邀擊殺賊甚眾州以寧謐博卒後香色未衰或諷改適香曰吾向誓云何而自辱邪晚年極貧力紉自給終無怨言

瓊枝荊州樂妓給事王府張獻忠破荊州召妓待宴瓊  
枝色藝出眾獻忠命之歌叱曰我大明臣妾豈肯爲賊  
侑觴賊怒以刀挾之哂曰若技止此耶若能使我畏死  
當服若矣獻忠斮之

曼仙瓊枝同列也豔慧冠一時獻忠召至極意逢迎獻  
忠大寵嬖之獻忠每豪飲輒令曼仙專侍一夕飲酣曼  
仙置毒酒中滿斟以進獻忠與昵語戲挽其頸使先飲  
卻之不得飲立斃獻忠始覺命磔其尸

貞女

明劉氏荆門劉潭甫女幼讀書識大義受姚姓聘將笄  
而姚夭誓不再適父母老而無子乃毀容易服事親如

子父死族人利其貲將恃強兼并劉捐產助餉詔特旌  
門曰荆山完玉

明程女江夏程輝唐女生有足疾年及笄父母將納媒  
妁言女請曰兒天棄也安可重棄於人且父母衰老多  
病兒何忍離願終事父母由是起居盡孝及諸兄嫂相  
繼歿遺孤半在襁褓仲兄婦唐寡而無子程撫育諸孤  
與唐相依終身無閒諸姪成立皆母事之姪聯槐婦鄔  
氏性賢淑事程尤謹程老而盲動止需人鄔委曲迎承  
織悉必中其意育者忘其爲育年七十終於家云

明石瓊秀興國州諸生石漢女也生嘉靖丁酉幼與羣  
女居抗志自好不爲冶容甲辰許聘州人張經世乙卯

經世病卒瓊秀欲奔喪父母力挽之不可比至經世家  
上堂拜舅姑稱張家婦留喪次不去父母屢迎之舅姑  
亦以貧故屢勸之歸瓊秀並以死誓語稍迫輒引刀自  
決自是宗黨內外無敢有言張氏故微而經世父方困  
諸生不能自給未幾父又病死瓊秀獨與其姑并日而  
食不言飢易衣而起不言寒癯然骨立至庚申三月嘔  
血死

明羅氏女天門節婦程夏氏婢初其父丐主放女字某  
及婚期某以非匹棄去父議改字女誓不可曰人賤我  
矣又自賤乎夏夫人兒師也由是紡績養其主母其父  
嘗得危疾羅哀禱獲愈壽六十三以處子終

李氏江夏貢生元稚女舉人柯秉綸聘妻也柯氏自普安州遷於江夏秉綸有才望年二十四以普安籍舉康熙甲午科鄉試父王誥候選縣丞嘗游浙江久未歸秉綸於乙未會試下第南歸訪父於浙江父命歸聚會林某視學江南邀秉綸入幕行至武進疾作卒於舟次喪歸江夏李請往弔父母不可李以死自誓父母無如之何乃許奔喪遂入柯門守志撫夫兄子紹庚爲秉綸後紹庚績學工文補江夏諸生甚有名譽能順承李志家貧授徒爲業脰脯所入未嘗入私室也李卒年七十餘矣乾隆九年旌

春喜沔陽彭氏婢也彭長龍本華亭人明季客江夏避

亂於沔陽新隄娶於王氏遂家沔陽長龍早卒王撫孤子邦畿成立今新隄彭氏其後人也王涉亂離艱難備厯有婢春喜自幼相從同甘苦焉春喜及笄王欲嫁之春喜泣曰婢子與主母同厯死生危難幸得復見太平主母形單影隻幼主尙未成立婢子義不忍適人王不能強春喜竟以處女老於彭氏卒年六十餘

王氏江夏王順卿女幼許聘岳正庭正庭罹變入旗以書辭昏父母欲他適王劓鼻毀面家人不敢強母兄卒後雉髮爲尼鄉黨義之相與輸貲結茅葺庵於崇府山名其庵曰貞靜

胡三姑江夏候選典史章斐女許字同縣馮國嬰年十

七國哭卒訃至慟絕者再卽適馮翦髮附殮服縗麻朝夕哭奠事舅姑孝謹天至姑病危禱天延醫姑復延一紀撫夫兄子爲嗣乾隆四十四年 旌

故遠安教諭江夏楊煜二女長許聘同縣鄧朝雲未婚而朝雲夭女年十九守貞不二次適同縣周光瑤歸周數月周亡女年十八矢節終身鄧周俱貧無依二女依母家終老

高貞姑江夏人幼字同縣陳姓子稍長陳子隨人質於廣東久無音耗年二十餘陳請如律罷婚高聞卽欲投繯父母遂止紡績不出閨門年六十四終

張氏漢陽諸生張蒼培女幼字同里熊崑崑故學士伯

龍五世孫也生而穎異能文羸疾早夭張年纔十五聞訃欲奔喪母阻之因不食投繯者再母知不可奪送歸熊氏時崑葬已逾月張往奠於墳號踊拜哭嘔紫黑血如中卵暈絕久之掖歸守制三年歸寧母氏有議張改字者張覺以手抉璫刺破其耳血流如注聞者驚歎由是兩耳遂缺人無敢議之者張能讀女訓言笑不苟事姑事母俱盡誠孝乾隆五十三年卒年八十一歲

陳氏均州葭新周未婚妻陳生十歲母亡父貿易於外念女無依俾待年於葭年十七未婚新周天陳手續衰麻服喪畢葭父母欲爲改字陳偵知卽於密室投繯家人駭然爲斷環詰之誓固守不易志舅姑許諾生員景

周新周之長兄也以己子爲之後陳撫以終身今二十有二年矣

張貞女傳

張女漢陽王國柱聘妻生三歲父卒母王爲字國柱國柱母死繼母生二子父卒繼母攜己生子適人真國柱僧舍王收國柱撫之時年十四屢資給使學買國柱蕩子也入手輒罄年二十遠去不歸時張年十九誓志不他適當國柱依張其已嫁之繼母棄後夫攜二子亦來就張王不納張爲周旋得留然以此漸貧困張躬紡績鍼帶饗煖不給則減已食食之國柱久不歸嫁姑逼張改適張以死誓久之母及嫁姑死張殮葬皆如禮撫教

嫁姑二子成立有室其次子感張義遠出尋兄亦不歸其婦再醮去張爲長子兩娶婦始得一子愛育之如己出歎曰王氏一綫不可絕也同縣彭湘懷爲作傳云彼時張已五十有九猶處子云

陳氏江夏戚宗譽聘妻父正濂爲同縣世族戚父子榮其先自浙江上虞宦游湖北遂家江夏與陳契好締盟未婚而宗譽客死廣東陳年甫十四卽奔喪守志孝事舅姑嶄然禮法今守節已十八年宗黨嘉之爲宗譽立後

孝女

熊氏女故遼東經略廷弼仲女也贅瀏陽胡氏子數年

父凶問至女躄踊擲身號曰痛哉天乎吾父戮力疆場  
遭斯誣搆誰無父母而罹斯酷邪一慟而絕世以比岳  
氏銀瓶云兄兆珪死孝別有傳兆珪婦李氏蘄州名家  
女嫺文史有禮法撫孤女宜教以詩書工爲文翰以節  
操終其身宜適同縣諸生李博雅李本宦門中落宜侍  
姑陳諸難備嘗母病百致醫藥不起宜有哭母詩無何  
夫卒宜又有哭夫詩皆辭旨斐惻觀者感動宜撫孤子  
玉振躬教以讀父書卒有成立

沈氏江夏張學悟妻陳氏學悟妾也學悟卒陳有遺腹  
晨夕禱天求子及孿生男女二嫡妾相與撫教矢志堅  
守女名少姑年十七歲有求聘者母將應之少姑哭止

之曰恨父死未識面願侍母終老弗忍離也遂終身不  
字沈先卒哭瀕於死陳繼卒少姑痛哭浹旬氣盡而卒  
族人憐之耐兩母葬

毛氏江夏熊清穆妻事孀姑羅盡孝羅病癱毛吮其毒  
聞醫言糞苦可治毛嘗糞甘涕泣禱天愿以身代未幾  
姑卒毛亦不起當毛病時子開疆僕進福俱幼亦禱天  
爲毛祈年知縣洪國輔旌其門曰孝義

章義姑浙江會稽人江夏流寓大進女也幼通文史隨  
父寓江夏年十六母嬰奇疾百藥不效義姑爲文籲天  
求以身代忽有異人投藥輒愈踰年又病痞甚章義姑  
泣禱如前復遇人授方得愈

荆門江氏二女以父母老無嗣立誓不嫁工詩其闈情  
絕句云香煙不肯承窗隙春色因何入得來見其操矣  
賢淑

方氏漢陽蕭丁泰妻嘉魚方逢時女也逢時丁泰自有  
傳方蕭皆世詩書又同貴顯丁泰八歲隨父宦入都穎  
銳出其儔類逢時器之因妻以女方嫻女誠有禮法數  
十年如一日丁泰卒貴州布政使任方歸已老矣丁泰  
有弟引萃字正子幼孤丁泰夫婦撫之成人用廕入國  
學補都察院照磨歷戶部郎中敏銳敢言任俠自喜中  
忌者陰謀左遷浙江鹽運司運判卒官無後順治二年  
秋方命其孫企昭爲之嗣手書告戚屬曰先布政有弟

正子是爲戶部君君襁褓中失所生母先姑命予善視  
焉授以胎髮至今藏之蓋責予母道也君幼而學長而  
昏且仕仕而宦海風波京華旅食皆老身克相先布政  
始之終之所不能爲者其嗣與命耳今老身自貴州歸  
感念戚里新故非一其聞不見其身或見其子孫獨戶  
部君無可見者惻愴不已嗟乎事至卹孤已痛今又安  
所得戶部君之孤哉尙念禮部府君之裔惟先布政一  
子三孫主君祠祀者非吾孫而誰屬敬卜八月之吉用  
一少牢敢昭告於宗祧命季孫企昭爲君後老身行年  
八十吾子行五十矣弱息三人不可謂多第揆一本之  
義吾孫卽若孫終不忍以含飴之弄忘若敖餒爾凡我

三黨宗親仁人孝子尙鑒予衷惠然肯來同致一灌以告於戶部之靈及老身存克襄斯舉以不負先姑暨先布政於九原方工詩丁泰初官京曹避黨禍歸杜門謝客者數年吟咏自遣方輒和之今篇什無傳

劉宜允字敬紘漢陽諸生龔臺妻也敏慧工詩所著有容光廬草其和南白病中吟十章語多樸摯意亦深厚得古人朋友切嗟之義自序云兒時初識書家君偶課以唐人詩略皆上口久之遂能暗誦稍長駸駸有敦好矣十六于歸良人南白先生方營營制義以規進取閒及吟咏謝未遑也旣而南白以詩自奮酬唱雖出閨門雅慕古人雞鳴警戒之意不欲以兒女柔靡之作墮志

士心晚得兒頗慧口授唐詩卽能成誦天不我祚兩兒  
俱殤順治庚子除夕微雪南白強予飲蕉葉輒醉限韻  
刻燭南白爲詩二章欲和未果惟高堂白髮菽水何歸  
雲鬢可謀將南白宗祊屬焉荏苒茲春我念未酬而南  
白病矣入山調攝憂深雪涕恨不能以身代每得病中  
吟而次第讀之卽次第和之蓋有慰藉之勤箴規之益  
先正有云詩道性情子亦勉爲性情所當爲者而已工  
拙勿計也宜允一字茗媛

徐氏廣濟饒嘉會妻父無子以子教教其女故徐受書  
習文翰不屑事家人鉛澤繡刺長適饒饒惟倜儻以文  
學試於鄉不遇旋魁武選年四十無子徐爲買妾妾又

生女徐曰命也請慎擇壻時劉醕驥甫五歲徐一見奇之曰此可妻也遂字以女留居親授句讀每與論古人大節言伯夷以所守非武王叩馬數語不知應天順人然臣子大閑不可易也姚氏降堯二女遂有天下如非大舜則許由潔志厲行未可爲非聖賢教人率履勿越矣夫魯男子以不可學柳下惠之可學古人者所當辨也用世卽公卿將相非異人任抑毋矜毋反多後福矣其持議高爽類此嘉會豪興使酒不甚理家事內外皆徐整飭家政肅然年五十卒

徐元象字奇孺廣濟舉人張楚偉妻也在母娠有異徵母以語父來建來建曰男也宜貴女也宜令名乎及元

象生愛之甚見同里子楚偉奇雅遂許聘也來建官壽  
州元象方生十歲來建病割烹臂肉愈之及年十二能  
爲詩文來建博購經史縱之誦習來建遷蘇州同知楚  
偉甥贅官舍已而歸試元象賦詩贈曰送君入楚江悠  
悠歸路長一去隔千里魂夢伴瀟湘送君入楚城攜手  
淚欲橫安得衡楚者墨池近北溟已而舅氏省之攜以  
歸家道故金山報父書曰兒自襁褓未離掌膝江頭拜  
別意緒蕭然舟行風水順利遂達京口江南佳麗過眼  
成陳廣谷大川靡能記憶舅氏出鮑氏大雷岸書讀之  
如賦如頌蓬窗瑣瑣恨不能竟所思官舍清華几案如  
滌挑鐙夜坐日起奉甘旨晨昏切戀戀耳阿爹阿母無

恙四時之序成功者退山林觴咏暢敘幽情何必紆拖  
青紫乃稱貴乎來建得書憮然曰吾拘係一官不及吾  
兒恬矣元象旣歸張布衣椎髻事舅姑維謹萬厯庚戌  
生子仁熙未彌月遭疾脫玉壺環繫兒臂爲韻語以屬  
楚偉詞甚悽惋未幾卒年十九

陳姑自號無波居士漢陽人幼字同里宋正學未婚而  
正學夭無波慟哭奔喪截髮矢志然宋父母俱亡無家  
可立乃歸守于陳陳故名家世儒業父兄俱喜賓客擅  
詩酒關羣芳別墅數會名流又揮霍尙義以此落其家  
無波其池上亭陳自署以明志也無波工詩通書史歸  
侍父母起居盡孝父晚喪明臥疾二十餘年無波取藏

書摘取比類日誦父側以排其悶母病革禱天請以身  
代家貧以紡績佐饗著無波集詩清朴自喜乾隆己丑  
卒年四十有四守志二十三年瀕卒自焚其詩今刊行  
軼詩一卷其鄉人所蒐輯也嗣子瑋

匡氏黃安盧堯臣妾也本名家女先世自膠州宦籍黃  
岡匡幼通尚書爛文史能識古今父奇蓄之堯臣方擢  
永平推官募匡名遣使聘之堯臣故名宦然年且五十  
又家有大婦他姬生子已三人其家欲弗許夜夢匡繡  
虎成文而鎮以玉盧於文爲虎頭遂報可匡歸堯臣生  
子爾慥堯臣遽病匡潔清侍疾累月衣不解帶禱天請  
減已算壽堯臣卒不起匡年甫二十九矢志撫孤會兵

亂歲祲擊家避難雖顛沛造次舉動必以禮法躬負先世木主死生與俱卽蓬廬一飯必率其子埽地虔薦而後敢嘗昏夜止宿必擇寡婦之家或絕糧累日不得食無跛踣失容先寄居黃州或刺繡易薪粟至五夜猶織紵不倦離亂無師以尙書訓故口授爾慥得無廢學初山賊逼城大姓多走避匡不欲行謀徙室近井備倉卒自盡旣寇變日深不得已挈孤輾轉於谿山險阻間能以深識遠慮先幾免難同難者往往賴之亂平爾慥於康熙丙午舉於鄉家亦漸起匡尤多隱德侍婢故許字人矣喪亂後失其婿有重貲求聘婢者匡不可屬人物色之則婿貧不能娶匡助貲嫁之有鬻身其家者詢之

則盧氏疏屬親立焚券歸之有司上匡節行得旌其  
閩匡以岸然儒範爲族黨所推重至今家傳其內行焉  
胡氏天門涂其江妻幼喪父事母盡孝母卒三年無笑  
容歸其江孝事舅姑其江績學能文友朋以文會至供  
具必潔家無升斗儲能急人患難歲歉有鬻妻求活者  
卽典質周之慧嫻文史而不爲詩文謂子弟曰生平勤  
誦習欲無愆於禮也婦德有受而無所授則著文以見  
才非婦職矣

金氏廣濟檢討金德嘉女年十七歸蘄州生員李澤潤  
二十八而夫天遺孤永芬甫七歲金撫孤矢志李故巨  
族澤潤伯父晟官浙江巡撫俄卒於官羣昆弟一時凋

謝家聲中落金佐理中饋動合禮節內外倚之康熙戊辰裁兵爲亂沿江村民逃竄金方省母於龍坪聞其家避兵東鄉道梗不得歸恐姑念孫遣永芬由間道之姑所已解所佩刀曰有急吾當自決兒歸善事祖母勤學成人吾死猶生矣未幾賊平婦姑母子相見泣慰如更生姑年高思子居常忽忽金慰解備至其姑爲之怡然卒年六十有五

王氏漢陽路遵王妻有寄金者其人容死王告夫歸金其子夫從外來見路仆病人王曰縱不可救盡吾心耳使人扶抵家療之歲飢或勸鬻婢王曰亦人子也爲擇配嫁之

林氏漢川程廷拭妻幼讀書工詩文年二十歸程有貧  
鬻身者林知爲良家子勸廷拭焚券贈金使治生姑病  
林刲股療之有婢竊物林避之婢僕皆感化廷拭爲連  
江知縣林多所匡益廷拭故多善政

劉氏監利蔡宗建妻性慈祥子士愷偶出見一婦人倚  
門哭甚哀謂夫死子幼歸告劉劉遂招其母子食於家  
有張某欠官逋不能償欲自殉劉遣子助以金

楊氏應山陳和宇妾也陳官旌德知縣納楊後房楊性  
淑慧正室屠氏及陳先納妾周氏皆宜於楊已而屠歸  
故里婚嫁兒女周亦隨歸以楊忠且敏留侍陳官舍陳  
改官龍游年已七十餘受事未幾忽遭危疾憐楊方少

艾喻以身後善事後人楊誓死不應顧疾甚篤醫皆束手楊徘徊無計則禱天刲其股肉和藥以進三啜而疾有瘳楊創深至骨束之以帛不使人知陳疾既愈見楊憔悴日甚固詰得其情一時爲之感泣應山孫紘撰楊少君割股志備載其事統不諳文法不著陳何許人而稱爲裕兒必其同縣也稱陳爲名孝廉必舉人也然選舉冊無陳和字名和字似其字也又不載事出何年紘於雍正年舉孝廉方正而稱陳爲裕兒陳亦必同時人也裕兒流俗姊妹之夫相謂爲聯裕也文指不明闕其所疑而著說如此

陳氏江夏夏世殮妻勤儉相夫以起其家夫卒教子廣義推施無倦鄉里族戚有不能嫁娶喪葬及衣食艱難解囊周之乾隆乙巳歲歉餓殍盈道陳命廣義出千餘金購米輸公爲粥以濟生全甚多廣義敘授中書科中

書舍人長孫兆泰例貢次孫兆觀補諸生

黃安盧氏列女傳

黃安盧氏婦德見於譜傳者凡十七人其中節烈賢孝殊科而家事牽連互有詳略如散分門類則觀覽難周如各詳始末則文多冗複今倣世家合傳之例自爲一篇入於賢婦之編蓋節烈賢孝成名不同惟賢則節烈與孝皆足以該貫之亦義例之通變者也堯臣妻彭氏妾匡氏弟舜臣妻周氏舜臣子之懌妻黃氏堯臣孫繩慈縉經繡纓繩慈妻王氏縉妻李氏經妻彭氏繡妻魏氏纓妻張氏曾孫濂晟湛漳滄之亟濂妻鍾氏晟妻秦氏湛妻毛氏漳妻王氏滄妻吳氏之亟妻耿氏元孫國

極國利國極妻鍾氏國利妻吳氏

堯臣妻彭氏性賢淑盧本素封至堯臣稍落彭歸齋妝  
甚盛嫁後餽餉相繼糟糠亦與或嘲曰此豈所謂糟糠  
婦邪彭善經營固辭母氏毋餽身勤紡織種藝桑麻課  
其畜牧家計漸充堯臣講學賓朋往來接踵款洽無不  
盡歡堯臣不問治具所從出也鄉薦後十上公車而行  
李維具堯臣亦不問其所自也及堯臣仕歸其弟盡有  
其囊家奴以訴於彭彭曰毋多言主人尙多一官恨不  
可分贈爾彭生一子爾愴堯臣多內寵諸子多庶出彭  
均愛無閒晚更勸納妾堯臣嫌無佳淑彭聞匡有才德  
遂力致之愛若女弟

舜臣妻周氏性孝友樂施與當歲大祲周傾倉賑飢自  
甘薄粥後值大疫施藥餌以濟閭里存活甚眾明崇正  
壬午七月初六夜流寇襲陷黃安婢僕奔告請行周叱  
曰女子不出閨門行將何往危坐室中賊入周罵賊遇  
害舜臣萬厯丙辰會試副榜

之慄妻黃氏姑周病疔疔黃親湯藥經月衣不解帶私  
嘗姑糞朝夕禱神願以身代姑死復甦言有神人告以  
生命當盡以孝婦嘗糞延壽一紀明崇正壬午流賊陷  
城周罵賊死夫赴自鄉試黃喪殯成禮痛姑遇害值持  
齋日因終身不忍茹葷卒年六十有二之慄爲某學教

官

繩慈聘妻王氏舉人黃岡一翥女幼嫻閨訓言動有禮  
明末世亂父遠游王隨母避亂陽邏磯時年十五患難  
中惟讀孝經內則諸篇嘗謂母曰古人明理所遇治亂  
生死皆足樂也及聞黃州城陷母投江死王亦從之  
縉妻李氏年十九適縉爲生員有名李生子甫二月縉  
病卒李矢志守節終身不歸寧晝夜祈天請延舅姑壽  
教子不爲姑息子澤能率教爲太學生

經聘妻彭氏諸生世濟長女也幼許字經將及笄適賊  
至岐亭屠馬埠頭一方震恐世濟挈女避月山寨賊攻  
城急女磨墨塗面扇頭易足穿藍縷襖以舊布衣襲其  
外徧體密縫呼天自刎父置尸亂草中寨隨潰盡屠之

寨臨潭世濟入水恍如女牽以渡遂得生次日始殮知縣表其閭曰閨烈經入國朝爲順治戊戌進士仕重慶府推官

繡妻魏氏明保定巡撫公韓女適繡而繡早死遺孤漢甫三歲滉未及週魏年二十有二矢志堅守卒年九十餘繡諸生也

繡妻張氏侍講希良長女也學語卽如成人常恭嘿坐雖甚暑暮夜必整衣年十九歸繡年少有大志好讀書爲名諸生張於舅姑娣姒閒恭謹無闕禮丁卯夫歿撫孤矢志守節自終

廉妻鍾氏適廉三載夫歿鍾年僅二十一立嗣矢志守年

六十以節終乾隆四年旌

晟妻秦氏年二十而寡撫二子教以義方皆讀書有文名康熙十八年有周氏婦貧病子絕乳哺秦周之活其母子次年歲祲與母王出其指作市米二十石賑左右鄰居鄰有張姓鬻身葬父秦焚券助以葬貲

湛妻麻城毛氏有節行湛貧歿毛矢志守節課子國謨國謨能文以前茅入學又爲謀娶家如洗矣甫得一孫而子婦繼亡卒撫孤孫有成王氏毛媵婢也已配奴生三子矣三子先放爲良皆貿易能治生欲迎養王王麾去曰我八歲從主於毛隨媵於盧歷數十年義不忍捨主遠去况主貧且老我去主將何依其子罔請不能得

則膳資歸王王以奉毛毛甚賴之竟終老於盧氏

漳妻王氏年十八適盧箠鐙佐讀六載夫卒姑張孀居  
數十載方病危王忍痛服侍姑亡王欲殉夫閉戶自縊  
遇救宗長以撫孤要之因以夫兒子國樾承祀塲又立  
從孫德耀爲孫姑卒時有老婢屬王善視之王終身厚  
卹不衰乾隆三年 旌

憶妻吳氏幼受讀女孝經女論語能解大義每誦立身  
之法惟務清貞四語不去口十九歸憶孝姑順夫內外  
稱之無閒越三年夫卒旣殮吳中夜投繯遇救不得死  
絕粒數日亦不死不得已服毒又不死家人迎其母至  
交口苦諭之然而病創已深未幾竟死年二十有四

之亟妻耿氏適之亟纔三載舅諸生紀慈以母喪毀卒  
之亟亦以父喪毀卒耿年方二十無所出撫棺一痛嘔  
血數升幾絕遂誓志堅守與母族相距止南北市終歲  
不一往夫弟之樞生子甫四日耿撫以爲子事孀姑備  
極溫靖人競稱之

國極妻鍾氏幼讀儒書知義理長適國極國極以縣試  
第一學使斥之抑鬱以卒鍾年二十一取嫁衣焚毀之  
矢志堅守夫兄友愛欲厚葬其弟鍾泣止之曰父母在  
堂家非有餘何可不顧所養爲死者憂旣葬奉夫木主  
每一飲食未嘗不虔薦而後食兩立嗣子皆殤幽憂得  
疾夢國極來迎自知死期曰死所願矣未能終舅姑養

又嗣子未定爲惓惓耳乾隆辛酉卒年五十有三夫弟  
二國材相國材子薰皆克讀父書有名譽序以次子  
陞爲之孫焉

國材妻吳氏幼熟內則女孝經動有禮則國材性剛近  
偏吳以宛順達於無疵善事舅姑能隱微喻志舅姑喜  
賓客吳治具潔豐雖別授爨無懈也叔娣周爲姑鍾愛  
國材從姊適成氏而貧舅姑憐之招居別室

事見孫  
媼傳 吳

皆極意周旋之舅姑歿身禮厚不衰日以體先志也盧  
族人眾賢愚不一吳皆遇之以禮橫逆之來屢置弗校  
其人亦多感化卒年七十有四子薰以老諸生應試乾  
隆己酉 恩賜副榜長女適周有節行次女適趙趙氏

七葉單傳夫死矢志苦節立嗣繼絕乾隆丁未 敕旌  
節孝

才慧

董少玉麻城周宏禴繼室也有才工詩宏禴前妻生子  
五女一少玉撫如已出宏禴兩遭貶謫閒關萬里少玉  
皆共之年二十九卒宏禴輯其遺稿王世貞爲之序

毛鉅龍麻城御史鳳詔之女幼穎慧讀書過目成誦工  
於詩長適尙書劉天和孫守蒙夫卒孝事其姑居小樓  
誓不踰閫堅苦自守六十餘年鄉人以文貞稱之老年  
爲詩益工年七十有九日不見字猶日夜使甥輩讀書  
臥聽之其爲詩多危苦之音不得見其全什而世所流

傳數章又非其佳者惜哉

江蘭字淑貞一字蕙叢漢陽名家女徽州府同知張叔  
珽妻也張江皆家世仕宦門第人才婚因稱嘉偶焉蘭  
幼失父母張養於諸兄家塾讀書通毛詩戴記列女傳  
嫺於吟咏歸叔珽能事舅姑與叔珽門內相莊和於諸  
舅叔珽多內寵蘭撫愛諸妾發於至誠其有解文墨者  
與爲酬答略如師友時或以妹呼之是時大家閨秀如  
劉氏吳氏紀氏王氏並以姻婭過從更唱迭和一時稱  
盛蘭尤深雋善清言女伴或言每恨婦人身處閨閣不  
知廊廟經綸蘭遽答曰正恐廊廟不乏閨閣中人若論  
閨閣則孝友施于有政何地非經綸邪康熙戊辰遭夏

逆之亂舉家竄避蘭扶持老姑登涉山水備歷艱難事  
平始反蘭爲文記之醜縷入情顛沛之中不忘孝友叔  
珽再試北闈不利蘭手書勉之言男子出外不得瞻顧  
家私若資斧不給妾兩兄皆宦京師必有所濟旅邸無  
聊燕趙佳麗何妨迭侍諸兄不惜黃金之贈妾已久鄙  
白頭之吟所效於君者止此矣若夫事賢友仁成其學  
業立身行道揚名顯親丈夫事業非閨房所能代謀惟  
君自努力耳叔珽得書愧之康熙丙子卒年二十有九  
蘭性至孝叔珽庶出也其所生早卒嫡母劉撫叔珽如  
已出劉病危蘭手疏禱天請以身代大略謂已早喪父  
母一可死也所生之姑不得一見再可死也可死不死

之身願以代聖善之姑張門幸甚辭旨酸惻見者莫不稱歎著有倚雲樓詩文集

徐蕙字瑤草叔挺妾也幼聰慧善鍼黹蘭甚愛之教以書字漸解吟咏與蘭時有唱和如弟子侍師不去左右年十九卒所著有厂樓集蘭常序其集曰厂樓者樓小而沿山似厂蕙所居也古今才士文人往往坎坷不遇才爲造物忌也語云士不幸而有才女不幸而有貌蕙之貌旣不幸矣又加不幸之才吾未知所終竟也蘭卒後五年而蕙果夭

陳氏字爽軒揚州人應城黃在瓚繼妻也生而穎悟甫九歲授以楚辭不期月覆之不失一字長遂能詩工書

善畫邊鸞之雀趙昌之花隨意輒肖尤喜秋海棠生動  
如眞常翻王維詩自況曰前身是畫師今世非詞客一  
時諸大家闔秀能文者咸師友之隨父棄官南游流寓  
武昌適在瓚喪偶聘之其事姑甚謹菜羹必嘗甘旨無  
缺婢媵雖眾不以假手也在瓚先有二子陳撫如已出  
人無閒言黃故豪性座客常滿陳供饋無乏久之不倦  
常笑謂黃曰往時書卷氣爲君化作醬齏香矣在瓚康  
熙丁酉舉人常謁選爲知縣陳爲詩送行勉以清白已  
而暴疾自知不起乃爲書並詩數章寄在瓚示永訣在  
瓚得書兼程歸而陳死已月餘矣陳卒年三十著有和

鳴集一卷

譚繡梅天門生員吳湛妻翰林侍講篆女孫也幼穎悟  
七歲能屬對母劉故工詩善繪事家貧設女塾教大家  
閨秀繡梅從受內則女誠諸篇通其文義與兄潤世以  
詩詞相唱和年二十歸湛湛故清苦家無餘物繡梅亦  
啟塾課女弟子資其脩脯佐湛口給生一子塲卽以媵  
婢納湛後房婢舉兩子撫愛如己出躬自課讀二子俱  
有成立家亦稍裕然執勤不倦里黨稱之著繡梅詩稿

一卷

劉之琪字豈凡潛江生員朱萬容妻生有夙慧父愛之  
授以經史寓目輒解八歲工詩讀書藜閣著有藜閣吟  
程氏孝感監生孫北池妻幼穎慧讀書女塾工爲詩文

適孫早寡所爲詩多清激危苦撫教孤子廷樞能承內訓爲諸生有名無何子媳復天竟撫孤孫以終

朱氏漢陽項占龍妻敏慧工詩與占龍相唱和多寓規諷疾且卒口占訣占龍二絕句其卒章曰莫因妾愛重辜負九泉心聞者悲之占龍乾隆甲子舉人

仙釋

劉邈邈天門養馬背人名方懼字天亨少讀書信口成句及聞邵堯夫子半天心之說遂棄舉子業游江夏奇鳳凰山麓五聖祠倚牆爲席編葦爲蓬市石於地堅臥其上無冬無夏凡三十年往往拾瓜皮梨核食之非人棄者不取寒至敗絮敝縷補綴掩體人初厭之旣稍知

其異四方士大夫過楚以得一語爲快率怒罵遇其喜則談終日旨本儒書自言吾非黃冠衲子對權貴每呼名發其隱或引譬經傳證故實初若河漢終如符契禍福輒中漢陽舉人孫世恪事之不倦爲撰語錄邀還居武昌其子迫飢寒從求生計與一敗衲乘舟許戒曰衣抵裘乘一粒可數人食也子歸檢其衲臭惡多蟣蝨焚之落珠璣瑟瑟無數異香滿空子婦盡炊其乘飯溢充棟狼籍籬落今養馬背有地名飯臺

章氏遺書卷第三十終